



Wantok

Today

March Issue i stap insait! P9,10,19 na 20

Namba 2111 Februeri 26 - Mas 4, 2015 28 pes

Niuspepa Bilong Yumi Ol PNG Stret!

K1 tasol

BEK 2 SKUL PROMOSEN!

MP 15122006



BAIM 2PELA SKUL BEK NA KISIM NARAPELA FRI

PROMOSEN BAI ISTAP INAP NAMBA 28 DEI BILONG MUN FEBUERI 2015

Only at... **THEODIST LTD**
THE STATIONERY SUPERMARKET

Waigani Drive, POM
Ph:313 9800
sales@theodist.com.pg

Markham Road, LAE
Ph:472 5488
saleslae@theodist.com.pg

INSAIT

Palamen Nius



Ol wok bilong Nesenel Palamen

P6

Ol praimer skul long Morobe bai kisim ol fri skul yuni-fom - P5



WOL nius poto - p14



Poto i soim wanpela man Esia i salim buai. Long wanem hap, mipela i no save. Bikpela stori yumi harim olsem ol Esia meri i kam salim ol yet (prostitusen) long hia. Nau yu lukim poto olsem ol Esia man i kam salim buai bilong yumi long hia. Askim i go olsem, Em i mekim wanem long hia, long PNG?

Yumi redi nau!

Pilai bai kamap long taim

Nicky Bernard i raitim

PRAIM Minista Peter O'Neill i tok Pasifik Gems bai kamap long de ol i makim long kamap, em long Julai 4 long dispela yia.

Dispela toktok bilong em i kamap bihain long em i wokabout raun long Tunde dispela wik long lukim ples

bilong slip na ples bilong pilai.

Em tok planti toktok i wok long kamap olsem bai yumi (PNG) i no inap redi long taim dispela bikpela pilai bilong Pasifik bai kamap. Em i tok, dispela ol toktok i wok long daunim yumi na ol i no tru.

Praim Minista i bin raun long ples we bai ol manmeri bilong pilai bai

slip long en na lukim olsem 90 pesen bilong wok i pinis.

Em i tok dispela ples bilong slip taim pilai i pinis bai gavman i givim i go bek long yunivesiti na ol sumatin i ken slip gut na mekim stadi bilong ol.

I go moa long pes 2...



WOK I GO GUT: Spot na Iven Minista, Justin Tkatchenko, i tok aut long Praim Minista Peter O'Neill, Gavana bilong NCD, Powes Parkop, na kontrak lain olsem ol wok redi bilong Pasifik Gems bai kamap long taim stret. Ol dispela lain i sanap antap long nupela gras long Sir John Guise Stadium long Mosbi. *Poto Nicky Bernard.*

Em Nau!



Wantok Niuspepa bilong yumi ol PNG stret!!

Pepa bilong lainim tok pisin tu!



K1.00
tasol long olgeta hap!

Buai maket na bia i kamapim dai

Esther Bralyn Wani i raitim

WANPELA man i dai na tupela i kisim bikpela bagarap long wiken long Pot Mosbi long hevi bilong buai.

Buai Maket long Morata, Komyuniti Hal i bungim wanpela dai long wiken long Sande apinun.

Dispela maket i kamap taim ol polis i rausim buai maket long Waigani bihain long Nesanel Kapitel Distrik (NCD) i putim lo we i tambu long salim buai na bia wantaim.

Wanpela man long Enga provins i dai long hap yet na tupela man long Westen Hailans Provins (WHP) i kisim bikpela bagarap stret na i stap long haus sik.

Tupela lida long Komyuniti Hal i tok ol i bin tokim ol pipel i salim buai olsem em i rong long mekim buai maket long hap bikos lo i putim tambu long salim buai, tasol ol pipel i salim buai na ol i yusim nem bilong Metropolitan Suprintenden, Andy Bawa, olsem em i givim tok orait.

Em i hat long kisim toktok bilong Mista Bawa long dispela. Tasol, ol toktok i kam long polis

hetkwata i tok dispela i no tru bikos buai ben o tambu i stap yet. Bikman ya i tok ol pablik no ken yusim nem bilong bikman bilong polis long gutpela bilong ol yet.

Dispela pait i kamap taim wanpela meri long Westen Hailans provins insait long Dei Kaunsel Distrik i salim daka long buai maket na ol man long Enga i spak na askim long takis. Tasol meri i no givim takis bikos em i karim daka long balus na prais i go antap tru na em i les long givim takis.

Spak man i belhat na em i apim tebal bilong meri i salim daka. Bihain long dispela, wantok bilong meri i paitim Enga man na pait i stat taim ol wantok i go insait.

Ol i skruim hevi i go moa na kukim wanpela teksu bilong wanpela man Hagen, na ol i brukim olgeta glas bilong wanpela bas. Planti man i kisim ol liklik bagarap.

Dispela i wokim na planti wokman na meri na ol skul pikinini i wokabut long bikpela moning i go long wok na skul long Mande, bikos ol papa bilong ol PMV bas i pret long ol bas bilong ol.



Pilai graun bilong ol pikinini i kamap buai maket i kamapim dai long Morata, Komyuniti Hal long Pot Mosbi. Poto: Esther Wani

Moa sumatin na no gat inap haiskul long Madang

James G. Kila i raitim

OL NESENEL memba bilong Madang provins i no gat gutpela plen long strongim na sapatim edukesen bilong ol pikinini husat i human risos bilong bihain taim.

Wanpela komyuniti lida bilong Sumkar lokal level gavman, Siming Tabb i mekim dispela toktok na i sutim tok long ol nesanel memba bilong Madang long no gat visin bilong ol long statim nupela haiskul na ol top-ap praimeru skul long ol distrik insait long provins.

Mista Tabb i sapatim toktok bilong Madang Provinsal Edukesen Edvavaisa, Moses Sariki olsem ol lokal lida long ol distrik i mas kamapim plen long wokim ol haiskul long ol distrik bikos namba bilong sumatin i wok long go antap bikos long fri edukesen (TFF).

Long stat bilong 2015 skul yia Madang Edukesen edvavaisa, Mista Sariki i bin toktok long media ripot olsem ol komyuniti lida long provins i mas toktok strong long ol nesanel memba bilong Madang long wokim sampela moa

haiskul long ol distrik.

Mista Sariki i tok Enga provins i soim gutpela piksa we Gavana Peter Ipatas i givim moa luksave long edukesen na i namba wan provins long sapatim ol sumatin.

Ol rural praimeru na komyuniti skul insait long Madang i pulap tru na namba bilong ol sumatin long wan wan klas i winim mak ol tisa i mas lukautim aninit long lo bilong Nesanel Edukesen Dipatmen.

Mista Saki i tok Madang provins i nidim sampela moa haiskul long ol distrik tasol ol lida bilong provins i no mekim wanpela samtning.

Em i tok ol nesanel lida bilong Madang nau i no save tingting long bihain taim bilong ol pikinini long sait long kirapim ol haiskul na ol kain samtning olsem long distrik bilong ol.

Em i tok ol bikpela edukesen institusen long Madang em no gat wanpela MP o nesanel lida i toktok strong long kamapim. Planti em ol hanmak bilong ol misin na ol lida bipo long taim bilong olpela provinsal gavman sistem.

Yumi redi nau!

I kam long pes 1...

Kontrak menesa i tokim praim minista olsem olgeta wok redi i pinis na ol bai mekim ol liklik wok long stretim gut na ples bai redi long taim ol manmeri bilong pilai bai kam slip.

Mista O'Neill wantaim Gavana bilong NCD, Powes Parkop na Spot Minista Justin Tkatchenko i bin raun long lukim ol wok kamap bilong ol dispela ples.

Ol ples bilong pilai we bai klostu i pinis em; Sir John Guise Stadium, Taurama Spot Senta na ples bilong slip long Yunivesiti.

"Yumi mas amamas long ol dispela ples, dispela ol bikpela haus bai stap longpela taim bilong ol pikinini bilong yumi na pikinini bilong ol long yusim. Yumi bai yusim ol dispela haus long planti wok long en long bihain, taim pilai i pinis," Mista O'Neill i tok.

Long wankain taim tu, Gavana Parkop i tok ol dispela ples bilong pilai i soim siti bilong yumi olsem yumi em bikpela kantri long Pasifik.

Em i tok taim em i go long mini gems na bit long Pasifik Gems, em i laik senisim siti bilong yumi long kamap gutpela siti long Pasifik na senisim laip stail bilong siti.

Mista Parkop i tok tenkyu long Praim Minista Peter O'Neill long putim mani long



VILES: Spots na Ivens Minista, Justin Tkatchenko, i raun wantaim Praim Minista, Peter O'Neill i go lukim ol Pasifik Gems infrastraksa developmen insait long Mosbi Siti. Hia, bosman bilong kontraksen kampani i bildim Gems Viles long Yunivesiti bilong PNG, hap we ol pilai i kam long ol Pasifik kantri na PNG tu, bai slip long en, i soim Mista O'Neil na Mista Tkatchenko long ol wok i klostu pinis. Poto: Nicky Bernard

kamapim dispela pilai. Em i mas tupela yia tasol ol wok redi i kamap, tasol ol wok i kamap hariap tru.

Em i tok tupela yia i lus nating long wanem pastaim gavman i no bin givim mani long kamapim ol wok redi inap long taim O'Neill-Dion gavman i kamap.

Spot Minista, Justin

Tkatchenko i tok ol dispela biding bai i ken pulim ol intenesenel lain long kam na pilai long kantri bilong yumi Papua Niugini, long wanem ol dispela haus em inapim mak bilong ol Lo bilong Intenesenel Spot.

Em i tok bihain long Pasifik Gem tupela bikpela Intenesenel pilai bai kamap long

kantri bilong yumi long wanem ol ples bilong pilai i redi long kisim ol.

Em i tok Papua Niugini mas lukautim gut ol dispela ples na bai yumi ken kisim planti pilai kam insait long kantri bilong yumi.

Praim Minista O'Neill bai opim 2015 Pasifik Gem long Julai 4, long Pot Mosbi.

Arawa i gat gutpela rot nau

ROT i kamap gut namel long Arawa na Buka taim ol i stretim 6 kilomita bilong dispela rot. Australia gavman i putim mani long dispela projek.

Dispela projek i stap aninit long Papua Niugini na Australia Trensport Sekta Sapot Program we em i hap bilong promis Australia i bin mekim long trenspot infrastraksa long PNG. Dispela kain wok em i gutpela long rausim sampela kos long rot.

Sif Seketeri bilong ABG, Monovi Amani, i tok rot namel long Kokopau na Arawa em i ikonomi na i helpim tru ol pipel. Em i tok sapo ol i stretim rot olsem i save givim gutpela sans long wokim bisnis na bilong ol pipel long kisim gutpela sevis.

Hai Komisina bilong Australia, Deborah Stokes, i amamas long sapotim dispela projek. Em i tok trenspot infrastraksa em i impoten long ikonomi na sosol developmen bilong Bogenvil na ol i amamas long fandim dispela wok.

Dispela K8.25 milien projek bai helpim ol liklik bisnis olsem Rising Sun ges haus long Arawa bai daunim prais bilong ol wok bilong ol.

Bos bilong ges haus, Betha Lorenz, i tok bisnis bilong em i save kisim helpim long rot long karim ol pipel na ol samting i go long taun. Em i tok rot i save givim hevi long em long senisim taiya bilong kar na stretim kar olgeta taim.

Dekenai kampani i kisim konrak long stretim dispela rot long wanem ol i save wokim planti wok long Bogenvil. Na em save givim wok long planti ol lokal long hap yet. Wok bilong stretim rot bai pinis long Epril long dispela yia.

Dispela wok bai stat long maus rot long Panguna long Morgan Junction we bai givim tupela hap bilong PMV klostu long maket. Em bai pinis long Tunuru tenof.

Mori askim gavman long baim skul fi bilong teseri edukesen

Stanley Nondol i raitim

SINGAUT i kamap nau long gavman i givim fri edukesen long ol sumatin long ol teseri edukesen.

Memba bilong Chuave, Wera Mori i askim gavman long baim skul fi bilong ol sumatin husat i stadi long ol teseri institusen bikos ol i stap long mak bilong painim wok.

Mista Mori i mekim dispela toktok long taim bilong dibet long palamen las wik. Em i tok i gutpela long gavman i givim fri edukesen long elementri i go long gret 12. Tasol ol sumatin long yunivesiti, koles na ol teknikel koles i kam long hatpela rot pinis na nau ol i stap long mak bilong kisim wok olsem na gavman i mas baim skul fi bilong ol tu.

Mista Mori i tok ol sampela yunivesiti na koles i sasim bikpela skul fi na planti papamama i painim taim long baim. Ol sampela yunivesiti i tok ol papamama i mas baim ful skul fi pastaim long ol pikinini bilong ol bai rejista.

Em i tok long Simbu provins, ol papamama i no tingim pikinini bilong ol bikos gavman i baim skul fi na ol i pilai kas long mani bilong ol.

Em i tok sapos ol papamama i no karim sampela hevi, ol bai kamap les manmeri na dispela i no gutpela. Em i tok mobeta yumi baim sampela fi olsem 70 pesen na papamama i ken baim 30 pesen.

Memba bilong ijivitari, David Arore i tok planti sumatin tru i pinisim skul long gret 10 na 12 tasol i no gat spes long yunivesiti. Em i tok planti sumatin i pinis long yunicesiti na koles tu i no inap painim wok.

Em i tok fri edukesen i kamapim planti skul liva na em i salensim gavman long kamapim polisi long kamapim sampela rot long ol sumatin husat i pinis long gret 10 na 12 i mas gat spes long tesari institusen na tu ol i mas gat spes long painim wok.

Oposisen lida, Don Polye i tok gavman i no gat gutpela polisi we ol sumatin husat i pinisim skul i ken painim wok long sapotim ikonomi. Em i tok fri edukesen i apim level bilong rit na rait tasol na i no gat gutpela polisi long helpim ol sitisen long wokmani.



BUKA ARAWA ROT-WOK: Wok i go het long 6 kilomita na K8.7 milien rot wok namel long Buka na Arawa. Gavman bilong PNG na Australia Trensport Sekta Sapot Program (TSSP) i fanim dispela program.
Poto: TSSP

Project fees, New uniforms, Text books? Start the year on a good note with all your back to school needs financed through a

BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

320 1212 / 7030 1212 - 24/7
 servicebsp@bsp.com.pg
 www.bsp.com.pg

BSP Official Sponsor of the 2015 Pacific Games

Pawa blekaut i sotim palamen kibung

PAWA blekaut i bin kamap long taim bilong dibet long palamen las wik, na lida bilong gavman bisnis, James Marape i stopim miting na skruim taim bilong palamen i bung gen i go long mun Me.

Pawa i bin blekaut taim ol memba i bin dibet long planti tok-tok bilong kantri long las wik Fraide. Dispela blekaut i bin stap inap klostu wan aua.

Blekaut i bin kamap taim memba bilong Chuave, Vera Mori i toktok long hevi bilong ol meri i salim skin bilong ol long painim mani na sapotim famili bilong ol.

Mista Mori i mekim toktok bihain long wanpela niuspepa ripot i stori bilong ol meri PNG husat i pait long ples bilong mekim mani. Ol PNG meri i tok maket bilong ol i kam daun bikos ol meri long Esia i kam tekova long bisnis.

Mista Mori i tok PNG em i Kristen kantri na i no gat ples bilong ol meri bai salim bodi bilong ol long mekim mani.

Mista Mori i tok lo bilong kantri i tok orait long fridom bilong relijon. Na yumi i gat ol kain kain na ol planti lotu i kamap long kantri. Em i



tok sapos yumi tok PNG em i Kristen kantri, yumi mas sensim lo bilong fridom bilong relijon na putim PNG Kristen kantri tasol.

Oposisen lida Don Polye na Deputi lida, Sam Basil i askim watpo na gavman i no putim stenbai jenereta long palamen.

Tupela lida i bungim ol medai lain long verenda bilong palamen koprens rum na holim pres koprens bikos ol rum i tudak.

Long pres koprens tupela i tok em gutpela long blekaut na palamen i skruim taim i go long mun Me bikos tupela i no sapotim Bil bi-



Oposisen Lida, Don Polye na namba tu bilong em, Sam Basil i holim pres koprens ausait long palamen haus bikos blekaut i kamap inap wan aua long las wik Fraide.

long Lae Siti Komisnin.

Praim Minista Peter O'Neill i bin tok palamen bai oraitim Lae Siti Komisnin bilong las wik na Lae bai gat Komisnin i lukautim em, wankain olsem Nesanel Kepitol Distrik

Komisnin (NCDC).

Memba bilong Lae Loujaya Kouja bai kamap siaman bilong komisnin.

Tasol dispela tingting i no go daun gut wantaim memba bilong

Bulolo Sam Basil.

Mista Basil i tok Provinsal Eksekutiv Kaunsil (PEC) bilong Morobe bai bung long dispela wik long toktok long Lae Siti Komisnin Bil.

PNG i ken planim rais na sapotim populesen

Stanley Nondol i raitim

POPULESEN bilong kantri i gro na moa pipel i wok long kaikai rais tasol kantri i no planim inap rais. Olgeta yia PNG i save baim 200,000 tan rais na long 2050 kantri bai baim rais long mani mak bilong K1.5 bilien.

Minista bilong Egrikalsa, Tommy Tomscoll i tok rais i kamap namba wan kaikai long PNG nau na long taim populesen i gro, kantri i mas painim moa rais.

Minista Tomscoll i mekim dispela toktok long Nesanel Rais Polisi bi-

long gavman. Em i tok sapos populesen i gro long reit bilong 6.5 pesen, long yia 2015, kantri bai baim 600,000 tan na taim prais bilong kaikai go antap na diman go antap, kantri bai spendim K5 bilien.

PNG i save baim 200,000 tan rais long mani mak bilong K500 milien long givim kaikai long 7.5 milien pipel.

Em i tok i no isi long gavman i kontrolim populesen na long taim diman bilong kaikai i go antap PNG bai yusim planti milien Kina long baim rais long ol yia i kam bihain

Kantri i save kisim rais long au-

sait na pekim long pasel long hia. Minista Tomscoll i tok sampela stadi long bipo i tok graun na klaimet long PNG i no gutpela tumas long planim rais.

Mista Tomscoll i tok dipatmen bilong em na ol speselis i lukluk gen long dispela na kamapim rais polisi long kantri i ken planim rais long daunim impot na sapotim ol pipel long groim na kaikai na salim rais na mekim mani.

Mista Tomscoll i tok gavman long planti yia i traim long helpim ol rais fama tasol i no gat gutpela polisi na i no bin sapotim gut wantaim mani

na planti rais projek i no bin wok.

Em i tok i mas gat gutpela polisi bilong gavman long sapotim rais faming long helpim ol pipel long groim rais bilong kaikai na salim.

Totol volum bilong rais ol kantri goim rais i salim em 7 pesen na PNG i kisim insait long 7 pesen.

Nupela polisi bilong rais i lukluk long gavman bai sapotim long painim ol graun na sapotim ol fama na kampani long planim rais na salim long ol arapela kantri, sapoti populesen long kaikai na ol fama i ken salim long lokal maket long mekim mani.

Stopim ran bilong balus long Simbu long liklik taim

AIR NIUGINI i laik toksave long pablik olsem ran bilong balus i go olsem long Kundiawa ples balus long Simbu bai pas stat long Sande Mas 01, 2015.

Dispela i lukim olsem ol Nesanel Epot Kopresen (NAC) wokman bai wokim mentenens long apgredim ranwe bilong ples balus.

Air Niugini i no save wanem taim tru dispela saspensen o stopim ran bilong balus bai pinis, tasol ol bai toksave sapos ol balus i ken stat long ran gen long dispela rot.

Ol manmeri husat i bin bukim tiket o i kisim tiket pinis i mas stretim gen rot bilong ol i go long balus olsem long Maun Hagen o long Goroka. Ol dispela senis long flait i no gat sas bilong ol.

Air Niugini i tok sori tru long dispela hevi i kamap.

Air Niugini i gat tripela ran bilong balus long wanpela wik i go long Kundiawa long Mande, Tunde na Fraide.

Deputi Oposisen Lida i askim long Lutheran Yunivesiti

Deputi Oposisen Lida, Sam Basil, i wari long wok na menesmen bilong Lutheran sios we ol i givim mani long lukautim bihain long palamen i givim tok orait.

Mista Basil i tok ol i harim dispela nem Lutheran Yunivesiti bilong PNG tasol ol i no save wanem hap em i kamap na husat i lukautim. Em i tok pastaim, Lutheran sios i bungim planti salens tasol ol i no save sapos em i gat spes long graun, ol akedemik samting, mani na ol man long wok long Yunivesiti.

Em i mekim dispela toktok long palamen wantaim minista i go pas long dispela bikos palamen i bin pasim wanpela Lutheran Yunivesiti bilong PNG Ekt long 2006, ol i bin rausim dispela ekt long 2012 wantaim wanpela nupela Lutheran Yuni-

vesiti bilong PNG Ekt na long Novemba las yia, ol i rausim 2010 Ekt na tokaut gen long 2006 Ekt.

Em i tok moa olsem ol i gat tripela lo long ol Yunivesiti, na, ol bai mekim wanem na wanem hap bai ol i kamapim em ol wari bilong ol. Ol Yunivesiti i gat mas gat wok bilong ripot long Palamen o sampela i lukautim ol olsem Dipatmen bilong Haia Edukesen, Rises, Sains na Teknoloji. Mista Basil i laik save wanem hap Lutheran Yunivesiti i stap long dispela lo.

Mista Basil i tok Lutren sios bai fandim Yunivesiti na ol toksave long media long kisim ol tisa na kisim ol yunivesiti program long ovasis. Em i tok 6-pela yia go pinis na nupela lo i kamap tasol Interim Kaunsil bai redi long Yunivesiti. Em i tok

dispela toktok em i long wanem samting i bin kamap long 2006 i go 2012.

Mista Basil i askim Minista bilong Haia Edukesen long tok save ol wok bilong Yunivesiti na wanem as dispela 2014 Lutheran Yunivesiti bilong PNG Ekt i bin kamap long Palamen na dispela lo bai kamap wanem.

Em i tok moa olsem ol i no harim long Yunivesiti we ol lvenjelikel Lutheran Sios mas holim mani na wanem wok i kamap long Yunivesiti na sapos i bin gat toktok namel long Dipatmen bilong Minista long dispela 2014 Ekt.

Em i askim Sansela bilong Yunivesiti Kaunsil na Vais Sansela o lvenjelikel Lutheran Sios long soim ol Anuel Ripot long ol wok ol i mekim.

Balob bai gat nupela bilding

BALOB Tisa Kolis bai hosim Faundesen Laying seremoni bilong nupela ol kolis bilding long Morobe provins.

Ol bikman bilong Papua Niugini wantaim Yuropen Yunien (EU) bai stap insait long dispela seremoni bai kamap long tude.

Dispela ol bilding em i bikipela tingting bilong EU we fanding i kam long Human Risos Developmen Program (HRDP1). Dispela konaston i makim bikipela samting we program i kamapim.

Konstraksen bilong wanpela bilding wantaim 6-pela klasrum bai gat spes bilong 210 tisa sumatin. Wanpela dabol domitori i bilong man na meri sumatin we 84 sumatin i ken slip long en.

Wankain stail bilong haus ol i mekim long Gaulim Tisa Kolis long Rabaul na Madang Tisa Kolis long Madang.

Long lainim faundesen bilong ston em i bikipela wok we i bin kamap gut namel long PNG-EU kopresen.

Ol bikman bai stap insait long seremoni em, gavana bilong Morobe, Kelly Naru, Deputi Seketeri bilong Edukesen, Dokta Uke Kombra, Embeseda bilong EU, Dokta Martin Dihm, Britis Hai Komisina, Simon Tonge na Embeseda bilong Frens, Pascal Maubert.

Long wokim ol bilding em HRDP1 i givim K16 milien long konstraksen tasol K5.4 milien em bilong Balob tasol.

Ol Praimeri skul long Morobe bai kisim ol fri skul yunifom

Bustin Anzu i raitim

MOROBE Provinsel Gavman i gat bikipela plen long saplain ol skul pikinini bilong Praimeri skul insait long provins. Na em i stat long lonsim dispela program pinis long stat bilong dispela yia.

Dispela bai nau mekim olsem olgeta pikinini husat i stap long Praimeri skul long provins bai kisim nating skul yunifom. Na mani bilong baim yunifom, em bai ol papa mama i ken yusim long baim ol narapela samting bilong skul long ol pikinini bilong ol.

Gavana bilong provins, Kasiga Kelly Naru i bin kamap wantaim dispela tingting, na Provinsel Eksekutiv Kaunsil (PEC) o Tutumang i tok orait pinis long en.

Dispela lonsing bilong ol yunifom i bin kamap long Rumu Luteran Praimeri Skul, long Rumion, insait long Huon Galf Distrik.

Long dispela taim bilong lonsing, Naru i bin tok Morobe Provinsel Gavman bai yusim K3 milien insait long tupela yia.

Em i bin tok tu olsem ol bai stat wantaim ol skul insait long ol bus ples na kam insait long taun.

“Dispela program bilong fri skul yunifom bai stat long ol skul istap long bus ples na kam insait long taun. Olsem na long hia, bai mipela igo long Kabwum na bihain go olsem long Menyamyam,” Gavana i bin mekim dispela toktok long taim bilong lonsing long Rumu Praimeri Skul.

Em i tok wanem mani ol papamama i tingting long baim yunifom, em bai ol i ken yusim long baim ol narapela samting bilong ol skul pikinini olsem sop, lait, bet na ol narapela samting.

Gavana i tok dispela program em ol i kamapim namba wan taim insait long provins na luk olsem, em i namba wan tu insait long kantri.

Dispela em wanpela helpim we Morobe Provinsel Gavman i kamapim. Narapela wankain program em Gerson/Solulu, we ol Provinsel Edukesen Dipatmen i peim skul fi bilong ol pikinini Morobe.



Lae Siti Meya Koim Trilue Leahy (l) na Gavana Kelly Naru long lonsing bilong fri yunifom projek.

Ol yangpela jenelis bai joinim Felosip

OL i askim ol yangpela jenelis long PNG long aplai long wan mun Felosip program long UN Hetkwata bai kamap long Nu Yok dispel yia.

Dispela Reham Al-Farra Memorial Journalists Fellowship Programme, em i bilong ol jenelis krismas bilong ol i stap namel long 22-35. Em bai givim planti gutpela lainim na sans long netwok long 15 jenelis long wol husat i aplai na ol i kisim ol.

Yunaitet Nesens Resident Kodineta long Papua Niugini, Roy, Trivedy, i tok dispela sans bai senisim laip bilong ol yangpela jenelis long kantri.

Em i tok dispela em wanpela gutpela sans we bai givim sans long ol yangpela jenelis long joinim ol narapela wok long wol insait long wanpela mun we ol intanesenel save man bai go pas.

Em i tok moa olsem ol jenelis i save gat bikipela wok long salim ol planti toktok bilong ol Yunaitet Nesens long PNG, na long tokaut long ol salens long developmen bilong kantri, long wanem ol i amamas long sapotim ol sans bilong lainim ol samting long ol yangpela wok man na meri.

Dispela Felosip bai givim ol lain bai stap insait narapela kain eksperiens bilong Yunaitet Nesens long wanpela bikipela taim long 70 krismas long histori.

Dispela Felosip bai gat ol ekvitiviti olsem wok wantaim UN midia wok man na meri, stap insait long ol ekvitiviti, akedemik woksop long 2-pela de long wanpela yunivesiti long Nu Yok, ol toktok long ol opisel bilong UN Seketeriet na ol sampela spesol iven.

Ol jenelis bai go i mas kamap wantaim stori long putim aut long

kantri bilong ol long taim bilong program, Mista Trivedy i tok em bai givim ol PNG namba wan lukluk long wok wantaim ol bikman long Niu Yok.

Dispela program bai kamap long Fonde, Septemba 10 inap Trinde Oktoba 8.

Ol i bai givim tiket long go long Nu Yok, liklik mani bilong painim hap bilong slip, kaikai na trenspot, na ol narapela. Ol bai kisim setifiket taim ol i pinisim program.

Ol i kisim nem bilong dispela Felosip long tingim Reham Al-Farra, wanpela yangpela wokmeri husat i bin dai long bom long UN hetkwata long Baghdad.

Dispela Felosip program em bilong ol junia na namel-level ripota long developmen kantri na Yunaitet Nesens Dipatmen bilong Pablik Infomesen i sapotim.

MS 14 bringim bel-isi long Ramu komyuniti

James G. Kila i raitim

OL SPESEL UNIT o Mobail Skwat Polis lain i save mekim bikipela wok long sait long lukautim sekyuriti long ol bikipela risos projek insait long kantri bilong yumi.

Stap bilong ol MS i save mekim komyuniti na divelopa bilong ol risos projek i stap wantaim bel-isi na amamas bikos sekyuriti em bikipela samting tru.

Poto i soim tripela strongpela memba bilong Mobail Skwat 14 bilong Goroka, Isten Hailans provins nau i stap long wok opresen long lukautim sekuriti long Ramu NiCo Projek long Madang provins.

Dispela MS 14 bilong Goroka em Komanda bilong ol John Midi i go pas long en em ol trupela lain bilong wok-hat na harim tok na bihainim stret wok bilong gavman long sait long lukautim lo na oda long eria ol

i go wok long en. Ol lain bilong wokim samting stret.

Tupela kampani bilong MS 14 nau i stap long Madang, wanpela i stap long Basamuk Rifaineri bilong Ramu NiCo na narapela i stap antap long Kurumbukari Main sait.

Planti lokal lain insait long Ramu Projek eria long Basamuk na Kurumbukari i amamas long stap bilong MS 14 bikos ol stap bilong ol i bringim belisi na lo na oda i stap orait long komyuniti ol i wok klostu long en.

Ol lain Mobail Skwat i save mekim bikipela wok tru long givim sekuriti long ol bikipela risos projek long kantri.

Stap bilong ol long ol projek eria em long lukim olsem ol risos projek we kantri i save kisim mani long en i ken go orait na bihainim stret plen bilong divelopa wantaim gavman.

Balob bai gat nupela bilding

BALOB Tisa Kolis bai hosim Faundesen Laying seremoni bilong nupela ol kolis bilding long Morobe provins.

Ol bikman bilong Papua Niugini wantaim Yuropen Yunien (EU) bai stap insait long dispela seremoni bai kamap long tude.

Dispela ol bilding em i bikipela tingting bilong EU we fanding i kam long Human Risos Developmen Program (HRDP1). Dispela konaston i makim bikipela samting we program i kamapim.

Konstraksen bilong wanpela bilding wantaim 6-pela klasrum bai gat spes bilong 210 tisa sumatin. Wanpela dabol domitori i bilong man na meri sumatin we 84 sumatin i ken slip long en.

Wankain stail bilong haus ol i mekim long Gaulim Tisa Kolis long Rabaul na Madang Tisa Kolis long Madang.

Long lainim faundesen bilong ston em i bikipela wok we i bin kamap gut namel long PNG-EU

kopresen.

Ol bikman bai stap insait long seremoni em, gavana bilong Morobe, Kelly Naru, Deputi Seketeri bilong Edukesen, Dokta Uke Kombra, Embeseda bilong EU, Dokta Martin Dihm, Britis Hai Komisina, Simon Tonge na Embeseda bilong Frens, Pascal Maubert.

Long wokim ol bilding em HRDP1 i givim K16 milien long konstraksen tasol K5.4 milien em bilong Balob tasol.

Noken lus tingting long

Wantok
pepa bilong yu!



K1
tasol!



Bringim bek, Senisim Kamapim Nupela Nesenel Palamen

Ol wok bilong Nesenel Palamen	“Save long Palamen” wantaim Hon. Theo Zurenouc, MP.
--------------------------------------	--

Welkam long namba 2 hap bilong ol toktok aninit long bikipela het tok “Save long Palamen bilong yu”. Insait long dispela pepa mi bai toktok wantaim yu long ol “wok bilong Nesenel Palamen”. Mi ting olsem em i mama bilong olgeta institusien, na em i mak bilong olgeta gutpela tingting na em i namba wan ples bilong mekim ol disisen long politik. Ol toktok ol i pasim insait long palamen i ken kamapim bikipela senis long mekim kantri i gro o em i ken mekim kantri i go daun.

Palamen bilong Papua New Niugini (PNG) em i wanpela semba bilong kamapim ol lo na em i gat 111 memba ol i bin ilektim long makim wan, wan ilektoret. Em I bin kirap long yia 1964 olsem Haus ov Asembli bilong Papua Niugini, tasol em i kisim dispela nupela nem bilong em long taim kantri i kisim independens long 1975. Palamen i stap long Pot Mosbi, kepitai siti bilong Papua Niugini. Ol 111 memba bilong palamen i save stap long 5-pela yia olsem memba bilong palamen. I gat 89 bilong ol dispela memba em ol i ilektim long ol open ilektoret. Narapela 22 ol i sanap long makim provinsal ilektoret

Palamen bilong Papua Niugini

Long 1975 Mama Lo i kamapim PNG Palamen. PNG Palamen i gat 5-pela bikipela wok:

- Kamapim ol lo
- Makim maus bilong ol pipel bilong PNG
- Was long wok bilong gavman
- Kamapim ples bilong wokim gavman
- Givim tok orait long nesenel baset.

Kamapim Lo

Palamen i save kamapim ol nupela lo na tu em i save stretim gen olupela lo i stap pinis. Long kamapim nupela lo o mekim liklik senis long lo i stap pinis ol memba i save kamapim wanpela bil (nupela lo) bilong toksave long Palamen long en. Planti ol bil em ol minista i save givim tok save bilong ol, tasol i no gat tambu long ol wan, wan memba nating long givim toksave bilong bil bilong wanpela nupela lo. Palamen bai paitim toktok long ol bil na ol Memba bilong Palamen bai mekim vot. Wanpela bil bai kamap lo sapos planti memba bilong palamen i givim vot bilong ol insait long palamen na sapos em i kisim tok orait bilong Gavana Jeneral (Royal Assent). Wanpela lo i gat narapela nem tu olsem Ekt ov Palamen. Wanpela bil i save kamap long stretim wanpela hevi o long painim rot bilong stretim sindaun bilong ol pipel bilong PNG.

Makim maus bilong Papua Niugini

Ol memba bilong Palamen i save makim tingting na laik bilong PNG. I gat 111 memba we ol i makim long go insait long Haus Palamen. Wan, wan memba i save makim wanpela bilong ol 111 ilektoret insait long PNG. Ol Memba bilong palamen I makim ol ilektoret na provins na ol bai painimaut na kisim tingting na wari bilong ol pipel na bringim i go insait long Palamen. Ol Memba bilong palamen i save helpim ol konstituuen bilong ol husat I gat sampela hevi long lo na oda, helt, edukesen na ol arapela sevis. Ol Memba bilong palamen tu i sae makim maus bilong ol pipel long luk-save gut na was gut long ol bil na ol disisen bilng Palamen i kamap bikos em bai mekim senis long sindaun bilong ol lain insait long ilektoret na provins bilong ol.

Kamapim ples we gavman i save kamap

Palamen i kamapim institusien we gavman i save kamap wantaim wanpela politik pati husat i gat bikipela namba i winim moa sit o wantaim koalisen o moa long wanpela pati i bung na kamapim gavman Bikos gavman i save kamap insait long palamen em i ken pinisim tu wanpela gavman sapos ol memba i no gat bilip long en, o no gat sapot i kam long planti bilong ol memba bilong Palamen. Gavman i save menesim ol bikipela wok bilong nesen olsem long treid, imigresen o long evaironmen. Gavman bai bihainim na karim aut ol lo we I kamap insait long Palamen Gavman bai makim maus bilong PNG long ol narapela kantri.

Sekim wok bilong gavman

Palalmen I save lukluk gut na skelim ol wok bilong gavman long planti kain we olsem:

- sekim gut ol bil, taim ol i paitim toktok insait long semba na long ol palamen komiti
- skelim gut ol disisen bilong gavman long ol bikipela polisi dibeit.
- Askim gavman long olgeta Kwesten Taim

Taim ol memba i save glasim gut wok bilong gavman long Palamen , em i save helpim long stretim wok bilong gavman bilong em i ken mekim gut wok, bilong lukautim ol wok na sindaun bilong PNG long yusim pablik mani na long bihainim laik bilong ol pipel bilong en.

Givim tok orait bilong nesenel baset

Bilong pinisim toktok, wanpela narapela bikipela wok bilong palamen em long givim tok orait long baset bilong nesenel gavman bilong mekim ol wok edministresen na long ol wok bilong nupela developmen Long wik bihain mi bai toktok long wok bilong Spika bilong Palalmen

Lukim websait bilong mipela long www.parliament.gov.pg bilong lukim moa wok bilong Palamen Komiti, stori bilong wan wan Memba, ol wok bilong kamapim lo, ol wok bilong semba, enuel palamen peformens ripot na planti moa. Long save moa long Memba bilong yu na ol gutpela wok bilong em, salim teks wantaim namba wan nem na las nem bilong em i go long telepon namba 70000300. Sapos yu laik save moa long ol sistem bilong palamen na we bilong wok, salim email i go long speaker@parliament.gov.pg o Ring long Sivik na Edukesen Menesa, Sarufa Haro long Ph: 3277448

Hon. Theo Zurenouc, MP
Spika na Memba bilong Finschhafen

Speselis helt woka pinisim trening na kam bek



Mista Kambo na Mista Tipiso (long fran) wantaim Deputi Siameri bilong Pot Mosbi Jeneral Haus Sik, Catherine Johnson wantaim Dairekta Medikal Sevis, Dokta Mokela na ol narapela dokta na woklain bilong PMGH i sanap long poto.

Stori na poto i kam long PMGH komyunikesen

TUPELA speselis helt woka bilong kantri i pinisim wanpela yia trening long Singapore Nesenel Helt Senta na i kam bek pinis long Pot Mosbi long dispela wik tasol.

Menesmen bilong Pot Mosbi Jeneral haus sik (PMGH) i amamas tru long tok welkam long Norman Kambo bilong Wewak Boram Haus sik na Alex Tipiso from Goroka Haus sik husat i kamap namba wan helt woka long kisim wan yia kos long mekim wok olsem Perfusionists.

Perfusionist i gat narapela nem olsem klinik perfusionist o cardiovascular perfusionist. Em ol lain we i gat save long wok wantaim hat-lang masin long taim bilong katim na stretim lewa o hat bilong sikman.

Dispela hat-lang masin bilong i save pamim blut na wara na holim win bilong siklain taim ol i kisim marasin bilong slip na dokta i stopim lewa long

taim bilong operesen bilong lewa, lang na ol narapela hap bilong bodi insait we i save pas long lewa.

Long mun Mas long las yia tupela wantaim i bin statim trening bilong tupela wantaim Singhealth. Operesen Open Hat PNG na SingHealth Senta i bin sponsa long skul bilong tupela man.

Mista Kambo na Mista Tipiso i gat bikipela tenkyu na amamas na ol i tok i mas gat planti moa long ol kain trening long ovasis wankain olsem tupela i bin kisim, long kamapim gut helt sevis long PNG.

Antap long dispela kain speselis trening; sapos helt dipatmen i baim moa ol speselis masin na ik-wipmen, em bai daunim namba bilong ol siklain long go painim helpim long ol ovasis haus sik.

Insait long taim tupela i stap trening, tupela i bin lukim planti ol wantok Papua Niugini i wok long go long Singapore long kisim medikal helpim.

Operesen Hat program

i mas kisim sapot bilong gavman wantaim moa mani long sevim planti moa laip long kantri.

Sapot bilong Sing health bai go yet long kisim na lainim moa speselis olsem bilong PNG.

Klostu K200,000 i bin go long trenim dispela tupela man tasol.

Narapela wokman bilong helt, Dokta Awin Karu, Anestetik o dokta bilong mekim sikman i slip long taim bilong operesen, nau i go long wok tupela wik wantaim Singapore Helt Senta wantaim narapela 5-pela speselis kritikal kea nes.

Ol i bin lusim PNG long mun Desemba 2014 long go kisim trening.

Insait long namba tu hap bilong dispela program, bai i gat wanpela Cathlab i kirap insait long PMGH, bilong stap redi long kain lain olsem Dokta Boko husat nau i wok long stap long namba tu hap bilong trening bilong em long intevensienel kadioloji wantaim Nesenel Hat Senta Singapore.



Praim Minista i kamap nambawan long kisim NID kat

PRAIM Minista, Peter O'Neill, i bin opim Papua Niugini Nesenel Aidentiti (PNGNID) projek long Mendi dispela wik, na em i tok dispela projek bai helpim gavman long ol plening sevis bilong em.

Long wankain taim tu Praim Minista O'Neill i opim Sauten Hailans Provinsal Rejistri Opis long Mendi na bihain em yet i go rejista na i go insait long PNGNID sistem.

Praim Minista i tokaut long as bi-

long dispela program bai i go long olgeta hap bilong kantri, stat long ol bikpela siti na i go insait long ol ples long bus stret.

"PNG Nesenel Aidentiti Projek bai helpim gavman long save we ol pipel bilong em i save stap na bai em i ken bringim gutpela sevis long ol.

"Gavman i mas gat dispela ol tok save sapos yumi laikim gutpela sevis long ol pipel," Mista O'Neill i

tok. "Sapos wanpela ples i wok long go bikpela, orait yumi bai nidim moa rot, moa polis na moa tisa long dispela hap.

"Em bai mekim isi long mipela long mekim gutpela plen bilong putim ol gavman sevis bikos em nau bai mipela save olsem ol ples o taun i wok long go bikpela," em i tok.

Em i givim tok piksa bilong ol lapun olsem 65 yia na ol lain husat

i no inap long wokabaut gut o lukluk gut bai inap long kisim helpim sapos ol i stap long PNGNID sistem.

"Mipela i mas save hamas namba bilong ol lain i lapun inap long ol i ken stap long wanpela eria na tu ol lain i gat hevi long bodi bilong ol na bai mipela i ken putim ol long pensen," Mista O'Neill i tok.

"Yu mas go rejista long PNGNID na bai yu ken votim ol kenidet bilong yu long taim bilong ileksen,"

em i tok.

Ol namba wan lain projek tim i bin lusim Pot Mosbi long Sarere las wik long go long Mendi long statim dispela projek bilong PNGNID ro-laut.

Opim bilong rejistri opis long Mendi i opim rot bilong olgeta narapela provinsal rejistri opis long kirap liklik taim bihain.

Dispela em bilong bringim ol nesenel rejistresen program i go daun long provins.

Intenesenel Komiti bilong Ret Kros helpim ol tarangu

INTENESENEL Komiti bilong Ret Kros (ICRC) long Kieve, Geneva i bin bringim ol kaikai, medikol saplai na o narapela samting i go long 5,000 o moa pipel husat i bin pas i stap long taun bilong Debaltseve we bikpela pait i wok long stap long wanpela wik i go pinis.

Pait i bin kamap long winim rot bilong ol inap long planti de bihain tasol long tok save bilong stopim pait i kamap long 15 Februari.

Meri go pas long ICRC opis long Donetsk, Joan Audierne i tok ol i bin redim ol samting bilong helpim ol pipel husat i stap kalabus insait long hap bilong pait tasol ol i no bin inap long go insait bikos pait i strong tumas long hap.

Mis Audierne i bin kisim 5-pela bikpela trak wantaim ol samting bilong givim long ol lain long Debaltseve, tasol ol i no go kamap hariap bikos long pait.

"I gat bikpela hevi i stap wantaim ol pipel na ol i gat kain kain nid. Ol gan na bom i kamapim bikpela bagarap long ol pabilik na praivet propeti na ol haus bilong slip.

Ol i wok long stap insait aninit long ol haus bilong ol long ol de i go pinis na nau tasol ol i wok long kam ausait, bihain long pait i pinis," em i tok.

Long ol tupela wik i kam bai ol pipel i kisim ol samting olsem blanket, kandis na ol kendel long ol pipel i ken stap

gut long narapela tupela wik moa.

Ol haus sik i pas, olsem na ICRC na ol narapela NGO tasol i wok long bringim medikol Saplai na bringim praimerit helt kea long ol pipel ausait long taun.

ICRC na Ukrain Ret Kros Sosaiti na ol lokal atoriti helpim ol lain bilong asples na ol lain i no gat ples long stap long tupela sait birua lain wantaim long Lugansk na Donetsk.

ICRC i save helpim ol pipel husat i save painim hevi long taim bilong ol bikpela pait olsem.

Em i gat opis hia long Pot Mosbi na ol i save wok wantaim ol lain bilong Hailans rijon we i save kisim hevi long ol traibel pait.

U.S. Embesi tok lukaut long stilman long intenet

U.S. EMBESI i bin kisim sampela ripot olsem insait long Papua Niugini planti lain i bin lusim mani bilong ol taim sampela stilman i yusim intenet na rausim bikpela tausen mani long akaun bilong ol.

Olgeta de long olgeta hap bilong wol, ol giaman lain i wok long stilman mani bilong ol manmeri long intenet.

"Planti pasin giaman em i isi long yu ken save sapos yu save long wanem kain we ol i save wok. Yu mas was gut na lukautim yu yet," U.S Embeseda long PNG, Walter North i tok.

"Planti taim, sapos yu go na sekim tasol long intenet pastaim long yu givim ol nem na akaun namba bilong yu, bai yu ken sevim yu yet bikos em bai tok save long yu sapos dispela man o bisnis i trupela o no gat," em i tok.

Nau U.S Embesi bai go pas long holim wanpela taim bilong toktok long dispela insait long Amerika Kona bilong Nesenel Laibre long Epril 2 long 10 klok I go 12 klok long ol dispela lain i save giaman na stilim ol mani long intenet.

Ol woklain bilong Embesi bai i tok save long ol dispela giaman pasin olsem; bai yu luksave olsem wanem sapos dispela lain husat i laik helpim yu em trupela o no gat, hao bai yu no ken paul long giaman bilong ol, na tu ol lain i kamap i ken askim kwesten long ol opisa bilong Embesi.

Kulang askim long plen bilong ol gret 12 dropaut

Stanley Nondol i raitim

OLGETA yia namba bilong ol gret, 10 na 12 dropaut i wok long kamap bikpela na namba bilong sumatin i no kisim ples long ol tesari institusen.

Memba bilong Kundiawa, Tobias Kulang i askim Minista bilong Haia Edukesen Malakai Tabar long tok klia wanem plen bilong gavman long helpim ol dispela studen.

Long 2014, ol 17 460 gret 12 sumatin i sindaun long eksam na 5,628 tasol i kisim ples long ol 30 yunivesiti na ol koles, dispela em 28.38 pesen tasol.

Minista Tabar i bekim asim na em i tok namba bilong ol sumatin i go antap namel long 2007 na 2014 na em i bikpela salens bilong gavman long apim spes long ol tesari institusen.

Minista Tabar i tok gavman i gat bikpela plen tasol em bai kisim sampela taim long karim kaikai. Em i tok long 2007 i bin gat 26 haia institusen na gavman apim i go long 30 long 2014. Tasol i gat moa wok long mekim long daunim namba bilong gret 12 na 10 dropaut.

Mista Kulang i tok em i sem pasin long gavman i givim fri edukesen long sumatin na i no gat plen long bikpela namba bilong dropaut.

Mista Kulang i askim dispela long palamen las wik bihain long wanpela ripot em i bin kisim i karim toktok bilong Sekreteri bilong Haia Edukesen Dr David Kavanamur olsem 2 pesen bilong gret 12 bai kisim ples long tesari na 15,000 bai no gat sans long skul.

Mista Kulang i dispela em bikpela hevi tru na gavman i mas tretim dispela olsem wanpela imejensi.

Mista Tabar i tok gavman i apim skolasip i go long 4614. Em i 1114 moa long las yia.

Mista Tabar i tok gavman i givim K62.5 milien long 2015 baset long haia institusen tasol dispela em i no inap long ol 6-pela yunivesiti long kantri. Em i tok gavman i givim K120 milien bilong ol koles na dipatmen bilong em i givim i go long wan wan koles pinis.



OL SKAUT: Ol boi na gel skaut i bin resim flek long seremoni bilong lonsim ol 2015 program bilong ol Poreporena Yunaitet Sios Wimen na Mens Felosip grup long las wik Sarere. Lonsing i bin kamap long Lakani Toi Memoriel Sios Misin Stesen long ples Hanuabada. Lukim stori long *Wantok* neks wik. **Poto: Veronica Hatutasi**

Ol strongpela meri i save tokaut long Vailens

“POWERFUL Voices” em i nem bilong wanpela buk we Australia Hai Komisina long Papua Niugini, Deborah Stokes, na Lynda Babao-O’Neill, meri bilong Praim Minista, i lonsim las wik.

Lonsim bilong dispela buk i bin go wantaim muvi piksa tu wantaim taitel “Harim Mi” i soim ol meri husat i save tokaut long ol pasin bilong paitim na bagarapim meri long Papua Niugini.

Famili Helt Intenesenel 360 wantaim sapot bilong Australia i bin

mekim dispela buk na muvi. Buk ‘Powerful voices’ i gat stori bilong 49 meri bilong 10-pela komyuniti long Westen Hailans na Sandaun provins.

FHI360, i wok wantaim ol narapela komyuniti ogenaisesen na givim ol kamera na disital poto long kisim laip stori bilong ol.

Mis Stokes i tok dispela buk na muvi piksa nau i givim nupela lukluk bilong pasin bilong givim komyuniti sevis na long stopim vailens.

Buk na muvi i soim olsem sapos ol man i sanap wantaim ol meri, komyuniti i ken pinisim pasin bilong paitim na bagarapim meri. Komyuniti i mas mekim wok bilong daunim vailens i save kamap long ol meri na ol yangpela gel na polis na ol kot i mas givim sapot bilong ol, na tu long edukesen na helt sevis.” Mis Stokes i tok.

Misis O’Neill i tok dispela muvi na buk i soim ol meri i gat tingting long sanap strong.

“Mi amamas long ol meri i kisim

na kamaut long tokaut long ol stori bilong ol yet, na long ol komyuniti long sapotim na holim strong dispela senis.

Insait long Papua Niugini, na tu long planti kantri long wol, ol meri i save painim hat long toktok long ol hevi ol i save painim na long ol hatwok ol i save mekim long stap nomol laip.

“Mi hop olsem ol meri long dispela kantri bai kisim strong na gutpela tingting i kam long ol Powerful Voices i kam long dispela buk na

muvi piksa. Tenkyu long Australia Gavman, FHI360 na olgeta lain husat i givim han long kamapim dispela buk na muvi piksa.

Dispela buk na muvi i hap wok bilong program, Komyuniti Lukautim Ol Meri, na em i makim 200,000 pipel bilong Sandaun na Westen Hailans, long ol wok bilong ol long stopim vailens na long wok wantaim ol komyuniti bilong ol long skulim ol lain, na long mekim gutpela sevis long helpim ol meri na ol yangpela gel.

Kuembi Meri grup kamapim gutpela mani

OL meri long Kuembi Meri Grup bilong Hidden Veli Maining projek eria i bin kamapim moa long K21, 000.00 olsem profit o win mani bilong ol namel long Novemba na Disemba long las yia na long Januери dispela yia.

Dispela profit mani i bin kamap long wok bilong wanpela PMV trak bilong ol we i save ran namel long Wau, Bulolo na Lae.

Dispela gutpela stori bilong bisnis i bin stap insait long kwata ripot bilong Kuembi i go long Mineral Risos Atoriti (MRA), bihainim lo bilong gren mani we nesanel gavman i bin givim long ol meri.

Las yia long mun Oktoba ol meri grup i bin kisim dispela PMV trak aninit long Smol Gren Program (SGP) wantaim mani i kam long Wol Benk. Em i bin kam long hap mani ol i bin makim long strongim ol teknikal asistens bilong ol maining institusien projek 2. Em stap

aninit long agrimen o wok bung bilong benk na PNG gavman. Na MRA i lukautim SGP wantaim sapot bilong ol gavman ejensi na wantaim ol meri grup bilong olgeta maining projek long kantri.

Kuembu asosiesen i givim ripot olsem long taim namel long Novemba na Desemba i go long Januери 2015, olgeta mani ol i bin kamapim em i kisim mak bilong K49, 315.00 wantaim ol mani ol i tromoi em K28, 020.00 olsem na ol i mekim K21, 295.00 totol propit.

Menesing Dairekta bilong MRA, Philip Samar i tok em i amamas long ripot bilong Kuembi Meri Grup. Na em i strongim ol meri long go het yet long lukautim gut wok bilong ol na bai ol i ken kisim moa mani long helpim ol famili bilong ol.

Mista Samar i tok promis long ol Kuembi na ol narapela meri grup husat i bin kisim wankain helpim



Ol meri grup bilong Kuembi wantaim PMV trak bilong ol.

long gavman olsem, gavman em i gat strongpela tingting long mekim wanem kain rot bilong helpim ol. Tasol ol meri yet i mas soim olsem ol i ken lukautim gut ol samting.

“Mi amamas long lukim olsem ol Kuembi Meri grup i mekim gutpela wok. Mipela bai wok yet long sapotim ol meri grup aninit long SGP,” Mista Samar i tok.

I gat 33 meri asosiesen na ol grup husat i bin aplai long gren

tasol 12-pela tasol i bin winim gren. Ol 12-pela meri grup olgeta bungim wantaim i bin kisim K1 milien gren mani.

Tasol ol narapela lain husat i aplai tu bai kisim helpim long stretim gen aplikesen bilong ol na bai ol i ken go insait long kisim gren bihain.

SGP em i wanpela projek bilong stap 18 mun na 12-pela grup i kisim mani pinis long baim ol samting bi-

long wokim mani olsem ol PMV trak na ol pigeri fam.

Gavman i mekim luksave long ol kontribusen bilong Morobe Maining Join Vensa (MMJV) i go long SGP. Kampani i save givim ol tok stia long pasin bilong lukautim mani na wok na long givim ol ripot bilong ol.

Dispela em i hap bilong bikpela wok patnasip namel long Gavman na MMJV long sapotim wok bilong ol meri.

Ol meri Raibus danis long Chinese Niu Yia

James G. i raitim



Ol meri husat i save wok wantaim Raibus Enjinia kampani i mekim save long danis na sekim, sekim fran long ai bilong ol lain China long Madang Bes bilong Ramu NiCo.

OL PIPEL bilong China i save selebretim Niu Yia bilong ol long mun Februari i no wankain olsem ol Westen kalsa, we yumi ol lain PNG i save bihainim.

Long las wik ol lain China husat i save stap long Madang i amamas long Niu Yia de bilong ol wantaim sampela liklik selebresen na kaikai.

Bikpela amamas i kamap long lukim sampela ol meri as ples i danis na soim stail bilong ol.

Ol dispela meri husat i save wok long haus kuk bilong Madang Bes bilong Ramu NiCo i putim kamap tupela danis long selebretim Chinese Niu Yia. Ol dispela meri i lainim gut stret na soim stret stail bilong ol long ‘hula hula’ na tu narapela disko stail long danis. Ol lain China tu i mangal stret long danis na joinim ol long danis.

Liklik selebresen long makim dispela spesel taim bilong ol lain pipel bilong China i bin kamap long Ramu NiCo Kurumbukari Main long Usino-Bundi distrik na tu long Basamuk Rifaineri long Raikos.

Long China, dispela em wanpela spesel taim we ol famili i save bung wantaim na kaikai na serim ol presen i go kam na amamas wantaim.

Wanpela moa misineri bilong ol SVD

OL lain Katolik long St Peter Chanel Peris long Erima, NCD i bin amamas tru long lukim pren bilong ol Pater Clement Daimas SVD, long taim em i kam bek na selebretim tenksgiving misa long peris long 25 Januери.

Pater Clement i bilong ples Bonaputa long Bogia. Em i bin wok diken long St Peter Chanel Peris long 2014 inap em i go bek long Madang we Asbisop Stephen Reichart i bin givim ordo long em i kamap pater long 20 Novemba long Alexishafen. Em i bin selebretim namba wan misa long Gawat haus lotu long Bogia distrik yet long Novemba 23.

Ol lain SVD oda i makim Pater Clement nau long go mekim wok misineri long Brasil, Saut Amerika. Nau em i wet i stap long ol pepa bilong em i redi long go long Brasil na em i wok long helpim Pater Marcius Bei SVD, long St Peter Chanel Peris. **Poto Stori – Anna Solomon**



Pater Clement Daimas SVD, i selebretim misa long St Peter Chanel Peris, Erima long Januери 25.

Daunbilo: Sampela mama long peris i sekhan long Pater Clement bihain long misa.



Tupela Sios grup kisim helpim long Morobe gavana

Bustin Anzu i raitim

GAVANA bilong Morobe Kelly Naru, i bin mekim wanpela tok promis long helpim tupela kongrigesen bilong Sangang Seket long Jabem Distrik bilong Evangelikal Luteran Sios bilong Papua Niugini (ELCPNG).

Em i tokim Sifu Kongrigesen na Saking Peris olsem em bai helpim tupela wan

wan long K20, 000.

Bilong Sifu, em long pinisim haus lotu bilong ol na bilong Saking, em long helpim ol long ranim ol wok bilong sios na ol narapela program long wok bilong sios.

Sifu Luteran Haus lotu i kamap 5-pela yia i go pinis tasol em i sot long mani na i no inap long stretim moa.

Tasol taim Gavana i laik i

go long Rumu Pramerik Skul long sampela wok bilong skul, ol lidaman bilong sios i stopim em na soim haus lotu bilong ol.

Gavana Naru i tok long mekim wok bilong laip na developmen bilong kantri, wok bilong sios em wanpela bikpela samting ol i mas stretim pastaim.

“Taim wok bilong sios na spirit i stap gut, ol narapela

samting bai kamap o ran isi tasol. Planti taim, wok bilong sios i save go baksait. Na dispela i save soim sain long plant taim,” Gavana Naru i tok.

Em i tok Saking Peris i kam aninit long Huon Galp distrik long sait bilong gavan, tasol long baundri bilong sios, em i stap aninit long Markham.



Mi no laik indai

LONG Trinde 17 Disemba 2014, mi bin joinim wanpela santu Misa long funeral bilong wanpela pastaim kausel bilong ples bilong mi long Lewotala, Is Flores long Indonesia.

Em i bin karim bikpela pen tru inap long tripela yia i go pinis. Em bin dai long Tunde nait.

Pater Octo, peris pris bilong mi i go pas long Santu Misa.

Mi wantaim Pater Tobias Tukan, namba tu Pater bilong peris bilong mi, na Pater Pei Hurint i bin joinim em. Pater Tobias i givim skul long taim bilong Misa.

Long skul bilong em, Pater Tobias i bin wokim dispela stori bilong wanpela man i no laik indai.

Long abrusim indai bilong em, em i no laik wokim haus klostu long nambis. Bikos em i prèt no gut bikpela solwara o tsunami bai kamap na kilim em.

Narapela pren bilong em i askim em long wokim haus antap long maunten bai solwara i no inap kamap. Tasol em i tok no gat.

Bikos sapos bikpela ren na graun i bruk, bikpela wara bai karim em wantaim haus bilong em na kilim em indai.

Em i wari na tingting planti.

Em i mekim disisen long wokim haus bilong em longwe tru.

Em i wokabout na painim wanpela ples nating we i longwe long solwara na maunten, na wokim haus bilong em.

Em i painim wanpela gutpela ples i gat grinpela gras na wara tu.

Em i amamas tru bikos em i tingting indai bai no inap kilim em moa.

Em bai no inap bungim wanpela hevi moa.

Em bai stap laip oltaim na laip bilong em bai kamap gutpela tru.

Long wanpela moning em i kirap na wokabout. Em i go spin na raun liklik.

Taim em i kam bek na kamap klostu long haus bilong em, wanpela bikpela pisin i flai i kam na kamap long haus bilong em.

Em i kirap no gut tru. Em i pret na kisim hat atak, pun-daun na indai stret.

Dispela stori i laik skulim yumi olsem, i nogat wanpela man o meri bai fri long indai.

Yumi olgeta bai indai.

Kain kain rot yumi bai bungim indai bilong yumi.

I nogat wanpela ples bai fri long indai. Long nambis, long maunten, long ples nating na long skai olgeta manmeri i stap long dispela ples bai indai tu.

Olsem na no ken wari long laip bilong yumi.

Tingim gut na yusim gut olgeta save na bihainim gut kainkain gutpela save na talen God i givim yumi long wokim gutpela pasin long narapela narapela.

Sapos yumi wokim olsem, yumi bai no inap pret long indai na sindaun bilong yumi bai kamap gutpela tru.

Mi save tingting oltaim tok bilong Papa bilong mi.

Mama i karim mi wantaim brata na susa bilong mi i no insait long Katolik famili.

Tupela i kisim baptais long 1970 taim mipela olgeta i kamap bikpela pinis.

Tasol pasin na laip bilong ol i winim ol narapela Kristen manmeri.

Wanpela samting em i save tokim mipela olgeta taim: **“Sapos yupela i marit, no ken pait. Mi wantaim mama bilong yupela i no save pait. Sapos yupela i pait, sindaun bilong yupela bai no kamap gutpela, sindaun bilong yupela bai bagarap”.**

Papa i no toktok nating.

Em i tokim mipela na em i soim long laip bilong em.

Maski ol i kisim baptais na marit blesim long 1970, tasol marit bilong tupela i kamap gutpela tru na i winim marit bilong ol narapela Katolik manmeri insait long peris bilong mi.

Bikos gutpela pasin ol i save wokim long bipo long kisim baptais na bihain long kisim baptais, tupela i no save pret long indai.



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)



AUSTRALIA: Saiklon Marcia i kamapim bikpela bagarap long sampela turis opereta long Keppel Ailan long Sentral Kwinslen, moa yet long wara i karim graun. Tasol ol i tok ol i no dai yet, tasol ol bai stretim ol samting na wok strong yet long ol operesen bilong ol. Taim balus i ran antap na sekim ailan, em i lukim olsem ol i wok long putim ol beg i pulap long wesana long stopim wara i karim graun long Putney Bis we saiklon Marcia i bin kamapim bikpela hevi las Fraide. Sampela ol haus long Hideaway we ol lain i go holide i save slip long ol i bagarap, tasol papa bilong Hideaway, Sean Appleton, i tok em bai opim bek long tupela wik taim. *Poto: ABC News*

ol arapela samting.

Mista Ciobo na Sogavare i wanbel long tupela kantri bai strongim moa wok poroman namel long tupela.

I gat salens long lidasip

Wanpela lida bilong Bogenvil long taim bilong bikpela trabel o kraisis, Martin Miriori i tok i gat hevi long wok bilong lida long Atonomas Rijon bilong Bogenvil..

Mista Miriori i bin mekim dispela toktok long taim em i stori wantaim ABC nius.

Miriori i bikpela brata bilong Joseph Kabui, na em i bin mausman bilong ol BRA na Bogenvil Interim Gavman long Honiara long 1990, pastaim long em i ranawe na i kamap refuji long Holan.

Tasol nau, Martin Miriori i tok em bai sanap makim pipel bilong loro long Panguna distrik long ileksen.

Em i tok Bogenvil i nidim ol gutpela lida bilong kisim rijon i go insait long bikpela vot bilong referendum long bruk lusim PNG na kamap independen insait long 5-pela yia i kam.

Saiklon Marcia i hamaim Kwinslen

Saiklon Marcia i bin daunim strong bilong en long kategori 4, tasol em i bin gat strong bilong en we i go antap long 250 kilomita long wanpela aua taim em i muv i go saut long nambis bilong Kwinslen.

Peter Andrews Sepe bilong PNG husat i stap nau long Gladstone long Sentral Kwinslen i bin toktok wantaim ABC long dispela saiklon.

Em it ok ol pipel long Gladstone i laik tok save long ol famili bilong ol long PNG long no ken wari long ol, long taim saiklon Marcia i hamaim Kwinslen.

Tropikal Saiklon Marcia i bin kamap long ol nambis namel long ol ples olsem St Lawrence na Yeppoon, na i bin kamapim planti bagarap.

Ol i bin pasim tu samting olsem 134 skul long planti hap na tokim ol pipel long stap isi na lukautim ol yet.

PNG seks woka i wari long salens

OL seks woka long PNG i no wanbel long planti seks woka bilong Esia i mekim wankain wok long kantri

ABC ripot i tok ol seks woka long Papua Niugini i sutim tok long Imigresen Dipatman long pasim ai na larim ol dispela kain lain bilong Esia kam go insait long kantri na kamapim hevi long seks bisnis.

Manesa bilong Friends Frangipani, em i save sanap makim ol seks woka long PNG, Cathy Ketepa i mekim dispela toktok bihain long ol ripot i kamap olsem planti seks woka bilong Esia i pulap nau long kantri.

Ol media ripot long PNG i tok olsem, ol dispela seks woka bilong Esia i save sasim namel long K500 i go inap long K1000 long sevis bilong ol.

Long wik i go pinis, ol nius ripot i tok olsem planti pamuk man na meri bilong Esia nau i wok long go long PNG na wok bisnis na ol i pulim bisnis bilong ol lokal seks woka.

Ol ripot i tok ol dispela seks woka i kam long Filipins,

Sainana na Tailan na ol i save sasim bikpela mani tru.

Pasifik Yut i lukluk long korapsen

Planti yangpela pipel bilong ol Pasifik Ailan kantri i stap nau long Fiji we ol bai toktok na lukluk long wari bilong korapsen.

Ol i bin statim dispela Pasifik Yut Forum Egens Korapsen na bai pinis tumora.

Ol lain olsem Yunaitet Nesens Hai Komisn fo Refujis (UNHCR) na UNODC o Yunaitet Nesens Opis on Drags na Kraim i wok bung wantaim Pasifik Yut Kaunsil long stretim dispela miting.

Ol dispela yangpela pipel i tok, korapsan em i wanpela samting i wok long kamapim ol bikpela hevi long olgeta Pasifik Ailan kantri.

Gregory Dime, bilong Solomon Ailan Yut fo Senis husat i bin stap long dispela miting i tok hevi bilong korapsen i stap long olgeta Pasifik Ailan kantri.

Tamara Mandengat, wanpela komyuniti kempen woka

bilong Act Now PNG, i tok korapsen em i wanpela kain hevi i kamap pinis olsem wanpela sik kensa long kantri bilong em.

Vanuatu Volkeno i pairap

Guria i kamapim liklik sunami tasol em i helpim volkeno long Ambrym ailan i pairap.

Peter Korisa bilong Vanuatu Nesenel Disasta Menesmen opis i tokim ABC nius olsem opis bilong ol i givim tok lukaut long ol pipel blong Ambrym long lukaut gut na no ken go klostu long volkeno. Dispela maunten paia i bin pairap long wiken.

Ol i tok olsem wanpela guria strong bilong en i bin stap long mak bilong 6.6 long Richter Scale i bin kamap namel long ol ailan bilong Ambrym na Paama i bin mekim dispela volkeno i pairap long Fonde long wik i go pinis.

Sampela ripot i bin tok tu olsem dispel guria i bin kamapim sunami tasol Peter Korisa bilong Nesenel Disasta Menesmen opis i tok dispela sunami i bin liklik na em i no bin kamapim bikpela hevi.

Em i tok tu olsem lain bilong Geo-Hazzards dipatman i go pinis long Ambrym long lukluk

gut long dispela volkeno

Solomon Ailan autim wari long Australia

Praim Minista Manasseh Sogavare i tokaut long ol hevi bilong kantri long gavman bilong Australia taim wanpela bikman bilong Australia i bin go long Honiara long dispela wik. Wanpela wari bilong ol em visa bilong go long Australia.

ABC ripot i tok Mista Sogavare i bin askim gavman bilong Australia long mekim isi long ol pipel bilong em long kisim visa bilong go long Australia.

Em i autim dispela wari long Palamen Seketeri bilong Foren Afes na Palamen Seketer bilong Tred na Invesmen, Steven Ciobo.

Mista Sogavare i tok ol pipel bilong Solomon Ailan i painim taim tru long kisim visa long go long Australia na ol i save wet longpela taim tu.

Mista Ciobo i tok bai wanpela delegesen bilong Australia i go long Solomon Ailan long mun Mas long toktok moa long dispela wari na

Kantri i sot tru long ol speselis dokta

Pablik helt sevis long Papua Niugini i wanpela eria i save sot oltaim long ol samting. I no gat inap bet long wod, marasin i sot, ol nes i sot, ol dokta i sot, haus sik i bagarap, na i go moa yet.

I tru olsem nesenel gavman i save skelim bikpela mani bilong baset i go long helt sevis bilong kantri long olgeta yia, tasol i gat moa hevi i pasim rot bilong kamapim gut dispela impoten sevis tru. Helt sevis i lukautim laip bilong ol manmeri na pikinini. Sapos helt sevis i bagarap, bai bikpela hevi tru i kamap long kantri.

Long dispela wik, yumi harim singaut bilong man i go pas long lukautim Yunivesiti bilong Papua Niugini Skul bilong Marasin na Helt Saienses we ol i save skulim ol dokta bilong kantri. Dispela skul em i wanpela skul tasol long kantri i save skulim ol medikel suden long kamap dokta.

Em i tok PNG i sot tru long ol speselis dokta long skulim ol nupela dokta. Em i tok i no gat gutpela ples bilong givim kwaliti trening long ol dokta.

Yumi harim tu olsem Pot Mosbi Jeneral Hospital i sot long ol nes bikos i no gat inap nes i save greduet na wok long ol haus sik. Planti nes i lapun nau na ol i ritaia, tasol i no gat inap nes long kism ples bilong ol.

Narapela senia dokta tu i tok bipo ol i save kism 60 medikel studen na givim trening long ol long kamap dokta. Tasol tude, dispela namba i go daun long 45 studen



tasol long wanpela yia.

I no gat inap spes bilong kism moa studen long dispela skul. Na ol PNG dokta husat i tisa long

medikel skul i winim planti yia pinis na klostu bai ol tu i ritaia long wok.

Dispela nius i mas mekim gavman i wari, bikos laip bilong ol

pipel long bihain taim bai i no inap stap gut.

Populesen bilong kantri i wok long gro hariap tru. Ol savelain i

tok populesen i stap long mak bilong 6.5 milien, sampela i tok mak i kamap pinis long 7 milien. Bai yumi bilip long wanem namba, bikos i no gat gutpela rot tu bilong kaunim ol pipel.

Askim bilong ol dispela senia dokta husat i save wok long haus sik na i lukim wanem samting i wok long kamap long helt sistem, i mas go stret long yau bilong gavman long stretim. I mas gat wanpela moa skul bilong ol dokta long kantri.

Ol dokta i tok i bin gat ol konprens i kamap pinis long stretim dispela hevi tasol i no gat wanpela samting i kamap yet. Ol i askim gavman nau long lukluk long dispela hevi na stretim hariap.

Ol pipel bilong kantri husat i harim krai bilong ol dokta i wanbel tu. Stretim dispela hevi nau bikos em i ken kamapim bikpela hevi moa long bihain taim.

Gavman i tromoi bikpela mani tru long sanapim ol rot, haus na spot graun na sekyuriti sevis long Pot Mosbi.

Tasol sapos i no gat gutpela helt sevis, ating bai PNG i stap yet olsem wanpela liklik tarangu na pipia kantri stret long ai bilong ol narapela kantri.

I no gat mining long paitim broslong ol milien Kina rot na ples bilong pilai na ol eakondisen miting haus long Mosi siti sapos ol pipel i sik na i no gat haus sik o dokta na nes long lukautim ol.

PNG bai kamap lida tru long Pasifik rijon sapos yumi inap soim olsem yumi gat ol top haus sik na speselis dokta na nambawan helt ke long ol arapela kantri long rijon. Yumi ken paitim broslong taim yumi winim dispela mak.

Jada 0151

Silicon Valley bai trenim ol bisnisman long PNG

OL saveman long Silicon Valley bai kam long PNG long trenim 40 bisnisman long Kumul Gem Changers bisnis plen kompetisen wantaim husat i aplai. Ol bai kam long Jun long hosim entrepranasp butkemp long 3-pela de.

Kumul Gem Changers em i wanpela bisnis plen kompetisen we i save lukluk long painim aut, na givim trening long ol nupela PNG bisnisman o meri wantaim ol nupela tingting long stretim problem long komyuniti bilong ol na developim kantri.

Kumul Faundesen Inc na Yunaitet Nesens Development Program (UNDP) wantaim sapot bilong gav-



Man i makim UNDP, Roy Trivedy.

man bilong Australia i bin kamapim dispela tingting long Desemba 2014.

Siaman bilong Kumul Faundesen, Anthony Smare i tok dispela program em i save stretim ol hevi long wol.

Tasol PNG i no gat gutpela hap bilong wok wantaim we i ken helpim ol bisnisman tasol ol i bai stretim dispela wantaim program bilong ol.

Em i tok moa olsem em i amamas long planti bekim i kam long olgeta hap long kantri. Em i tok

sampela bilong ol bekim i narapela kain na gutpela

stret we kain kain wok lain long PNG i mekim.

Man i makim UNDP, Roy Trivedy, i tok ol i amamas long stap insait long nupela program long PNG. Em i tok ol i painim ol lain i ken mekim senis na tokaut long ol sales long nupela we. Em i tok moa olsem ol pipel i save lukim problem, em ol pipel we i ken stretim problem.


Mista Trivedy i tok sapos ol i skulim ol na givim ol rait sapot, dispela kantri bai senis long bihain taim.

Dispela kompetisen em bilong ol pipel husat i laik kamap bisnisman o meri o husat i gat bisnis pinis. Na dispela program bai go het long 5-pela yia.



AUSTRALIA: PLANTI tausen haus long Kwinslen, i no gat pawa bihain long Saiklon Marcia i bagarapim ples. Primia na Polis Minista bai go long rijon long glasim na skelim ol hevi na bagarap we saiklon Marcia i bin kamapim long hap. Primia Anastacia Palaszczuk na Jo-Ann Miller i stap long Rockhampton we polis na pipel i wok long stretim ol samting bihain long saiklon i bin kamapim ol bikpela bagarap long hap. Ms Palaszczuk i raun lukim Rockhampton Stet Haikul bipo em i go long Yeppon.

AUSTRALIA: Saiklon Marcia i ikamapim bikpela bagarap long sampela turis opereta long Keppel Ailan long Sentral Kwinslen, moa yet long wara i karim graun. Tasol ol i tok ol i no dai yet, tasol ol bai stretim ol samting na wok strong yet long ol operesen bilong ol. Taim balus i ran antap na sekim ailan, em i lukim olsem ol i wok long putim ol beg i pulap long wesan long stopim wara i karim graun long Putney Bis we saiklon Marcia i bin kamapim bikpela hevi las Fraide.



BALI NAIN: Bubu bilong drag smagla, Myuran Sukumaran insait long wanpela vijil long Sydney i askim presiden bilong Indonesia long mekim samting nau na sevim laip bilong em. Sukumaran na Andrew Chan i wetim det penelti we faiaring skwat bai kamapim. Ol bai dai olsem bikos ol i bin ogenaisem Bali Nain heroin trefiking long Epril 2005.

LIBYA: PLANTI tausen pipel bilong Ijip i ronawe lusim Libya bihain ol Islamik Stet Jihad i katim het bilong 21 Koptik Kristen. Klostu 15,000 pipel bilong Ijip i save stap long Libya, wanpela kantri we pait i stap long en, i ronawe lusim kantri bihain long ol Islamik Stet (IS) i kilim dai 21 Koptik Kristen, Ste mldia bilong Ijip i tok. Las wik, ol woa balus bilong Ijip na Libya i bin sutim ol IS taget insait long Libya bihain ol IS Jihad lain i soim video we ol i katim het na kilim dai ol Kristen. 20 i bilong Ijip. Cairo i askim planti tausen lain bilong Ijip husat i wok long Libya long lusim kantri, na i sataim ol balus long kisim ol long Tunisia, kantri i stap klostu long Libya.



Saiklon Marcia: Ol pipel bilong Rockhampton i lainap long planti awa long kisim fiul... pawa i aut yet. Long ol pipel i stap long rurel Rockhampton, smel bilong fiul i bikpela tru na i ken mekim man i laik traat. Taim Saiklon Marcia i kamapim bagarap na hevi, planti pipel i wok long baim fiul bilong yusim long ol jenereta na wara pam. Sampela kros na tromoi han i kamapin pinis taim ol kar i bihainim ol longpela lain long kisim fiul. Ol i salim pinis planti itausen lita bilong fiul. Dispela petrol stesin em i wanpela tasol long taun i gat pawa, fiul na ol woklain stat yet long ol klinap wok i stat. Planti pipel i lainap long kisim fiul bikos ol i no save wanem taim pawa bai kam bek.

Singsing bilong laion i makim yia bilong meme

Don Niles
Institute of Papua New Guinea
Studies i raitim

Papua New Guinea Friendship Association i wokim singsing bilong laion tu.

Ol manmeri PNG i go pas long dispela wok.

Long ol wan wan laion, wangepa man i bosim het bilong en, na narapela i bosim bodi na tel bilong en. Taim laion i samsam, ol manmeri i no save singsing long maus, tasol ol i paitim wangepa samting i olsem kundu.

Ol i paitim kundu ya long tupela stik. Dispela kundu em *da gu* long tokples Saina.

Na narapela man o meri i sanap tu na paitim simbol (*nao*) na gong (*luo*), ol i wokim long ain. Kundu ya i bihainim kalap kalap bilong laion yet, na simbol na gong i bihainim kundu.

Sampela man o meri tu i putim giaman pes.

Wok bilong ol em bilong kirapim bel bilong laion na mekim ol manmeri i lap.

Dispela i makim ol lotu man i bin lukautim ol laion na kirapim dispela pasin.

Kalap kalap bilong laion i soim planti stail bilong kung fu tu.

Sapos ol i laik rausim spirit nogut long bisnis bilong ol, papamama bilong stua bai hangamapim kabis na wangepa retpela skin pas long ai bilong stua. Dispela skin pas i gat mani insait.

Na *nian* i save pret long kala ret tu.

Taim laion i kam long stua bilong ol, em bai singsing na kalap kalap na bikpela nois bai kamap long musik.

Laion nau bai kaikai dispela kabis na retpela skin pas.

Kaikai pinis na em bai spetim dispela lip kabis gen.

Dispela i makim olsem bisnis ya bai gat planti gutpela samting long nupela yia bikos masalai nogut i go pinis.

Ol Saina i bihainim dispela pasin tumbuna bilong ol.

Maski ol i stap long PNG o wanem hap, ol i mas bihainim na holim strong long amamas long nupela yia. Em kalsa bilong ol.

PNG tu i gat planti stori bilong masalai. Yumi mas holim strong kain stori olsem.

Em kalsa bilong yumi na makim yumi tru.

Dokta Don Niles em i Acting Director bilong Institute of Papua New Guinea Studies na tu em i bosim Musik Dipatment long hap.



Foapela laion i kam insait long Vision City long Mosbi.



Man na meri i paitim gong, wangepa kain kundu, na simbol long singsing bilong laion.

"GONG *xi fa cai*" em Hepi Nu Yia long tokples Saina.

Long 19 Februari ol Saina i makim stat bilong nupela yia bilong ol.

Ol i tok em yia bilong meme, tasol sampela i tok em yia bilong sipsip. Long tok ples Saina, *yang* i makim meme na sipsip tu.

Bilong makim nupela yia bilong ol na long mekim dispela yia i kamap gutpela, ol Saina i wokim singsing bilong laion ol i kolim *wushi*.

Long ples we planti Saina i stap long PNG tu, bai yu lukim dispela singsing bilong laion i kamap tu. Tumbuna stori bilong as bilong dispela singsing i olsem.

Long bipo tru, wangepa masalai nogut i bin kilim planti manmeri na ol pik na arapela enimal ol lain i save lukautim. Nem bilong dispela masalai em *nian*.

Hariap tru na dispela *nian* i kilim planti lain na ol bikbel na ol taiga i no inap stopim em.

Ol manmeri i pret nogut tru na ol i askim wangepa laion long kilim dispela masalai.

Wanpela ya i raunim dispela *nian* na em i ronawe i go haik. Tasol taim em i go, laion i singaut, "Yupela lukaut! Bai mi kam bek na kaikai yupela olgeta!"

Wanpela yia bihain nau, dispela *nian* i kam bek gen, tasol laion ya i gat nupela wok bilong lukautim banis bilong king, olsem na em i no inap helpim ol nau.

Ol manmeri i wari nau, olsem na ol i bungim ol mambu na laplap bilong makim het na bodi bilong gaiaman laion. Tupela man i holim dispela na ol i wok long kalap kalap na singaut olsem laion stret.

Nian i lukim dispela giaman laion na em i pret no gut tru. Em ronawe olgeta. Em i no kam bek na ol manmeri i stap gut gen.

Olsem na long taim bilong Nu Yia bilong ol Saina, singsing bilong laion i kamap bilong rausim ol masalai nogut na mekim yia i kamap gutpela.

Tingim tu, long bipo tru Saina i no gat laion, tasol long 2,000 yia bipo samting, ol man i bin salim laion i go long king bilong Saina bilong amamasim em na grisim em tu.

Nau laion i kamap bikpela samting long ol.

Long Vision City long Mosbi, China-



Laion i laik kaikai kabis i hangamap i stap na paniman i helpim em tu.



Kabis na retpela skin pas i hangamap long ai bilong stua.



Wanpela man i helpim laion i go antap bilong kaikai kabis.

Ol Foto: Don Niles

Stori bilong tumbuna



Trobrian Ailan

BIPO tru, long ol ailan bilong Trobrian, i gat wanpela kain pipel tasol i bin i stap na ol save mekim wanpela kain tok tasol. Orait long wanpela de wanpela lain man i bung wantaim na ol i pasim tok long wokim wanpela haus taua na bai i go antap tru long klaut.

Ol i go long bus na kisim ol kain diwai na rop, na ol i stat long wokim dispela taua i go antap. Ol i wok i go inap ol i kamap long long wanpela hap kalaut na sampela long ol i kalap i go long dispela hap klaut. Taim ol i kalap i go long dispela hap klaut nau, taua i bruk na i pundaun na ol lain man hia i stap long klaut i pas nambaut long ol rop ol i bin wokim taua long en. Ol i wok long traim long rausim rop tasol ol i paul moa moa yet wantaim ol rop hia insait long klaut.

Olsem nau sapos yu harim klaut i pairap, em yumi save ol dispela man hia insait long klaut i traim traim long rausim rop nambaut long ol lek bilong ol. Na ol arapela lain hia i bin stap na i pundaun wantaim taua i go daun long graun. Taim ol i pundaun, ol i go daun nambaut long olgeta liklik ailan klostu long ailan bilong ol.

Ol dispela man i statim nupela ples bilong ol yet long ol hap hia ol i bin pundaun long en. Olsem nau i gat planti narapela kain kain tok ples i stap namel long ol dispela ailan.

Gibson Henry i raitim



Pre Long San

Dispela stori i kam long Anis Koma bilong Westen Hailans. Em i tok, long wanpela taim bipo yet, wanpela man i bin stap long Moge Nambaga. Nem bilong em Mit Kungil. Dispela man i man bilong pait na i strong tumas na i no gat wanpela man inap long em.

TOKSAVE:
WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail unit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG* o email edres : editorial@wantok.com.pg Telepon namba: 3252500.
Tenkyu

Raun wantaim Wantok kru ...

Strongpela sapota

Nicky Bernard i raitim

PILAI spot i bikpela samting long olgeta hap kona bilong Papua Niugini, na sapos yu no gat sapota, bai pilai bilong yu na tim bilong yu no inap pilai gut long pilai graun.

Gordon ragbi tas em liklik pilai we ol komyuniti bilong Gordons na Erima long Mosbi i save kamapim olgeta yia long amamasim ol yangpela manmeri long pilai, na lus tingting long ol no gut pasin.

Olgeta yia tu, ol sapota bilong ol save kam na bung wantaim na amamas na tok pilai na lukim tim bilong ol pilai ragbi tas.

Planti long ol liklik i save bungim ol yet tu. Sampela ol i skul wantaim na taim tim bilong ol i pilai long wiken, ol i save kam bung na sapotim tim bilong ol na amamas wantaim.

Planti tim i bilong Gordons tasol, na taim gem i on, olgeta manmeri i save go bung long Gordons Polis Bareks pilai graun na bik maus long tim bilong ol. Na taim tim bilong ol i skoa ol



Poto Kepsen: Ol pompom meri bilong KB Eels i lap taim kamera i kisim ol. Dispela ol yangpela meri save mekim pilai graun kamap laip stret. Poto Nicky Bernard.

dispela liklik sapota meri i save go namel long pilai graun na danis.

Dispela i mekim na olgeta komyuniti long Gordons na Erima i save long ol yet. Taim

pilai i pinis, ol bai bung na amamas wantaim na go long wan wan haus bilong ol.

Gordons Polis Bareks bai kam laip long dispela wiken taim ol fainel tim pilai long kisim win

mani na kap bilong 2014 na 2015 kap bilong Gordons.

Ol pompom meri bilong ol dispela tim bai mekim amamasim ol manmeri husat bai go na lukim pilai long dispela taim.

Ol meri soim stail

Dispela ol meri i soim stail long danis stret long amamasim Nu Yia bilong Saina long Madang long las wik Trinde.

Ol dispela meri i redim danis na samsam stret long amamasim dispela taim we Ramu NiCo i ogenaisim bilong ol Saina wokman meri bilong en long Madang.

Planti ol wok lain bilong Ramu NiCo i no inap go bek long ples bilong ol long amamas wantaim famili olsem na ol i amamasim dispela kastom bilong ol wantaim ol PNG lain long Madang olsem long piksa.

Saina Nu Yia festival o sampela i save kolim 'Spring Festival' em spesel taim bilong ol lain long Sainalong amamas na bung wantaim ol famili na kaikai na selebretim dispela de.

Dispela ol meri Madang i bilas stail tru olsem ol meri long Pasifik Ailan na danis hula hula o tamure stail strong long amamas wantaim ol lain Saina long Operesen Bes bilong Ramu NiCo long Madang.



Planti lain Saina long PNG i amamasim dispela de long wei na stail bilong ol yet long wanem ples ol i stap long en. Long kantri bilong ol yet long

Saina tu i lukim bikpela samting tru i kamap we ol lain bilong Saina i stap ovasis i go bek na bung wantaim famili na amamasim dispela taim.

Kalsa bilong China we i luksave long 'Spring Festival' o Sainis Nu Yia em i blong bipo bipo yet na i winim moa long 4000 yia.

Long wanpela de, ol i pait wantaim ol birua na lond dispela taim, wanpela spia bilong banara i flai antap tru i kam na sutim stret pohet bilong Mit Kungil.

Em i pundaun long graun na i slip i stap, na blut i wok long kapsait long pes bilong em. Taim em i laik dai, em i tokim ol pipel bilong em bai em i no inap lusim ol. Tasol spirit bilong em bai igo long ples bilong san. Em i tok yupela mas ting long mi na askim mi

long helpim yupela long taim bilong pait.

Ol i planim bodi bilong Mit Kungil pinis na ol i mekim bikpela kaikai na singsing long onaim nem bilong em. I no longtaim nau, ol birua i kamap na pait gen wantaim ol man bilong Nambaga. Ol i pait tasol i no gat wanpela man i tingim Mit Kungil na wanem samting em i bin tokim ol long taim em i dai. Long taim ol i pait na san i kamap na i lait i stap, orait nau ol tingim ol toktok bilong Mit Kungil.


Orait ol i kirap na pre long spirit bilong em na askim long pogivim ol na helpim ol.

Long narapela de tu, ol pre gen pinis na ol i go long pait. Long dispela taim san i lait strong moa na bagarapim ol ai bilong ol birua na ol Nambaga pipel kilim planti birua tru bilong ol.

Olsem nau long dispela taim ol manmeri long dispela hap i save pre spirit bilong san, Mit Kungil long helpim ol long olkain wari.

Em nau! Ol pikinini i ken painim rot i go long ples wantaim Wantok kru...

Sudoku



Yu pinis! Em ples bilong yu

		4	9	1	3			
1	9					4	2	
			8				9	1
9					8	3	6	
		7		9		2		
	8	2	1					5
2	5				7			
	7	1					4	2
			2	6	1	7		

1	5				2		6	
	3			1	5	9		
		7	4				5	1
4					7			6
		1		2		4		
5			1					2
8	1				4	6		
		9	2	5			7	
	7		8				4	5


Ansa bilong Sudoku # 81 na # 82 neks isu

4	5	7	9	6	8	3	1	2
2	1	6	5	3	4	8	9	7
3	8	9	1	2	7	6	5	4
7	4	1	3	5	2	9	6	8
8	9	5	4	1	6	2	7	3
6	2	3	7	8	9	5	4	1
1	7	8	6	9	3	4	2	5
9	3	4	2	7	5	1	8	6
5	6	2	8	4	1	7	3	9

1	6	3	5	2	4	7	9	8
8	4	5	9	7	3	6	1	2
7	9	2	6	1	8	3	4	5
2	5	4	3	8	1	9	7	6
9	3	7	2	4	6	8	5	1
6	8	1	7	9	5	2	3	4
4	1	6	8	3	9	5	2	7
5	7	9	4	6	2	1	8	3
3	2	8	1	5	7	4	6	9


Ansa bilong las wik Sudoku # 79 na # 80

Ansa bilong las wik Kroswod isu 2111



Antap

- 1 Pulim toktok
- 2 Bikpela spot long PNG.
- 9 Las de bilong wik.
- 10 Satan i tokim Jisas long tanim i kamap bret.
- 11 I ken.
- 14 Bekim.
- 16 Danis
- 18 Bia bilong PNG
- 21 Ink bilong printa.
- 22 Sutim long naip.
- 24 Ples bilong wara i ran.
- 27 Infomesen teknoloji
- 28 Rong ol polis i tok wanpela man i mekim.
- 29 Abus bilong solwara.
- 30 Bilong laitim paia.
- 32 Wanpela han bilong Yunaitet Sios bipo.
- 34 Hap diwai ol i sapim pinis.
- 36 Sapos pawa i stap olsem bai masin i wok.
- 38 Samsam.
- 39 De bipo long asde.
- 43 Em i save ran long rot.
- 44 Sotkat long tok maunten long tok Inglis.
- 45 Ilektoret long Is Nu Briten.
- 47 Nem bilong meri.
- 49 Pepa i soim olsem yu baim pinis.
- 50 Ropim long wokim nekles.
- 52 I no hatwok.



- 5 Bagarap i kamap long kapa na ain.
- 6 Painap
- 7 Mekim planti wok.
- 8 Pulapim
- 9 Program bilong sosel media.
- 10 Fada Krismas.
- 12 Ol soldia.
- 15 Putim kamap long ples klia.
- 17 Namba tri mun.
- 19 Ples bilong Adam na Eva.
- 20 Namba bihain long 12.
- 23 Namba faiv mun.
- 25 Bikpela wara.
- 26 Miksim.
- 28 Solwara i kirap.
- 31 Stopim
- 32 Wanpela ples long Sandaun.
- 33 Bikpela de bilong soim kain kain samting.
- 35 Takis bilong sevis na baim ol samting.
- 37 Wanpela politikal pati.
- 40 Liklik naip.
- 41 Hap tok bilong pinisim prea.
- 42 Sia bilong ol MP.
- 43 Desemba 25.
- 46 Ples long AROB
- 48 Wankain olsem 2 (Antap).
- 49 Moskito net
- 50 Bilong rausim ol pipia.
- 51 Samting bilong sindaun.
- 53 Tul bilong sapim naip.
- 54 Ples we wara i raunim olgeta.
- 56 Wanpela ilektoret long I sten Hailans.
- 57 Soim bikpela rispek.
- 60 I no pas gut moa.
- 62 Sop paura.
- 65 Wankain olsem 28 (Antap).
- 69 Rul.
- 70 Tupela i bilong lukim ol samting.

Daunbilo

- 1 Em i givim lait long graun.
- 2 Dring long moning.
- 3 Givim strongpela toktok long mekim samting.
- 4 Baim na yusim.



Mi gat wari na mi laik helpim

Dia Laipain

MI MARIT long 10-pela yia na mi gat tupela naispela pikinini.

Mi na man bilong mi em mitupela ol Kristen lain.

Mi wok long glasim man bilong mi stat yet long mitupela i marit na long namba 5 yia bilong marit, mi painimaut olsem em i wok long paul wantaim wanpela marit meri.

Wanpela taim, mi bungim dispela meri long opis bilong em na mitupela i paat.

Bihain long dispela, mi bin ting olsem tupela i stopim paul pasin, tasol no gat.

Mi harim ol stori olsem tupela i poroman paul raun yet.

Insait long 5-pela yia, man ya i wokim planti samting long dispela meri.

Meri ya bai lusim man bilong mi o? Worried about my children

Dia Pren,

Tenkyu long serim wari bilong yu wantaim mipela.

Mipela i sori long kain hevi olsem yu bungim long en.

Yutupela marit em ol Kristen lain na yu wok long mekim samting long traim stretim hevi i kamap long marit laip bilong yu.

I gutpela olsem yu wok long traim mekim samting long stretim wari na hevi bilong yu. Taim ol man i komplek na i no mekim samting long stretim wari o hevi, hevi bai stap yet na i ken go bikpela sapos ol i lusim olsem i stap.

Taim manmeri i luksave olsem i gat hevi i stap na mekim samting long



stretim, ol i kamap papa bilong hevi o wari we ol i mas lukim olsem ol i stretim.

Pren, mipela i bilip olsem yu bin traim long toktok wantaim man bilong yu long dispela hevi tasol yu no tokim mipela em i tok wanem.

Sapos yu no tokim ol papamama bilong yu long dispela samting, i moabeta yu tokim ol na ol ken helpim yu long dispela hevi yu gat long en. Na ol lotu pren bilong yu?

Yu ken toktok long sios pasto o ol gutpela marit lain we i ken givim yu gutpela stia na toktok.

Marit bilong yu i gat luksave long ol lo bilong yumi long kantri olsem sios, sivil/gavman o kastom pasin?

Hevi long paul pasin namel long ol marit lain long dispela kantri i wok long go bikpela na em i wanpela bikpela samting we yumi mas klia long en.

Yumi save olsem i gat planti mama na papa we i bungim dispela hevi, tasol ol i no toktok. Ol stap isi na karim hevi ol yet.

Sampela i mas tingting long nem na luksave ol i gat long en, sampela i pret long ol man bai paitim ol nogut, sampela i pret olsem dispela samting bai kamapim sem long ol, sampela i gat mani hevi, sampela ol pikinini na planti moa.

Yu ken kisim Ristrening Kot Oda long man bilong yu na dispela marit

meri sapos ol i wok long pren na paul wantaim wanpela narapela yet.

Laipain i save promotim helti marit we i gat amamas long en.

Sampela taim, wanpela i mas sanap strong na wokim samting long kamapim senis na stretim hevi olsem dispela yu gat long en.

I moabeta yu lukluk gut long rot yu bihainim long stretim hevi yu gat long en.

Long kamapim hevi, tupela lain wantaim i stap insait long en.

Watpo na dispela hevi i kamap? Em i stat olsem waenm? Sampela ol samting em yu yet i mas askim yu yet na ansaim ol.

God i God bilong laik pasin na kamapim bel isi pasin. Em i gat intres o laik long laip na welfea bilong yu. Go long God bikos em i laikim yu. Ritim Matyu 11: 28 na Romens 8:28.

Ringim mipela long namba 3260011 long kisim moa stiatok o kam long opis bilong mipela na yumi ken toktok na yu ken kisim kaunseling tu.

God i ken givim yu bel isi na gutpela tingting.

Pren bilong yu Laipain

Sapos yu gat wari o hevi, rait i kam long dispela etres: Lifeline Counselling Services, P O Box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niusepea, tasol mipela bai putim ol wari na hevi bilong yu.

Laipain

Tok Pilai wantaim Kanage



Stori bilong wantok opis...

Wanpela taim long moning, wanpela man i bin ring i kam long opis na i askim olsem em i laik tok tok wantaim Kanage, meri i bin ansarim fon i tok, "Sori Kanage i no kam yet long opis. Orait man ya i kirap na i tok, em i laik tok tok wantaim Toro, meri i tokim em, Toro tu ino kam yet long opis. Man i tingting go na i askim, sapos Biabia i stap inap mi tok tok wantaim em?"

Meri i smail long telefon tasol na i tok; sori tru. "Em tu no kam yet long opis." Man ya kirap na tok yupala! olgeta man i no kam yet long opis, wanem taim tru bai ol i kam?

Tasol samting tru em i no save olsem olgeta 3-pela man ya i wanpela man tasol.

Taha, Wantok

KANAGE i go long Nu Yia danis...

Wanpela Nu Yia nait, Kanage i kisim liklik wara na i spak nogut tru bilong wanem em i laik go danis.

Taim em i go insait long geit, em i pilim pekpek kilim em no gut tru. Em hariap tasol i go long sait long as bilong ol banana na i pekpek i stap.

I no long taim, DJ i putim fevoret musik bilong em, Waikiki Tamure. Aiyo, Kanage hariap tasol kirap na putim han long painim lip bilong banana long rapim as bilong em. Em nait na em i no lukluk gut. Goan em i putim han stret long lip banana we i gat ol kurakum long en.

Em i rapim as nau hariap em i go insait long danis ples na painim gel pren bilong em. Kisim gelpren nau tupela i go insait long namel stret na sekim, sekim hula, hula. Tupela i danis stap nau, Kanage i pilim wanpela kurakum i stap long as bilong em na i kaikaim stret long insait rot bilong pekpek.

Man Kanage i pilim bikpela pen no gut tru tasol hat long em i putim han i go insait na rausim.

Em i pasim tupela lek bilong em wantaim na sanap tasol na apim han bilong em i go antap na singaut bikmaus, "Aiyo lewa io!" Em i tanim sekim bodi i go long lephan na i go long raithan.

Na gel pren i askim, "Hey Kanage olsem wanem na yu sanap tasol na taitim i go i kam?" Kanage tok, "Ah lewa, em i nupela yia olsem na mi laik senisim stail bilong mi long danis ya!"

Ol skwat!

Salim ol gutpela Kanage tok pilai i kam long: Kanage Tok Pilai P.O. Box 1982, Boroko, NCD Port Moresby. Email: jwilson@wantok.com.pg

Ol raun nabaut poto



RAUN LONG PALAMEN: Tripela yangpela rikrut polis meri i go lukluk raun long Palamen haus wantaim ol wan lain bilong ol. Dispela tripela nupela polis meri i bilong skwat wan bilong dispela yia 2015. Ol bai mekim bikpela wok taim Pasifik Gems i kamap long Julai.



GUTPELA WOK: Ol meri long Tomin Cando bildas na konstraksen i sanap wantaim bos man bilong ol long Gems Viles. Ol dispela meri i mekim bikpela wok long planim gras na plawa long stail Gems Viles bipo long ol pilai manmeri i kam na slip long dispela ples.



NUPELA MASIN BILONG SEKIM GRAUN MAK: Minista bilong Lens Benny Allan, i holim nupela masin bilong sekim ol graun mak taim em i lonsim wantaim ol narapela memba bilong Palamen. Minista bilong Plening, Charles Abel, na Gavana bilong Wes Nu Briten, Sasindra Mutuhwel, i sanap long witnessim dispela de.

Foren risev i stap long K5.8 bilien

Stanley Nondol i raitim

NESENEL gavman i putim was long foren karensi treding long ol benk na dispela i lukim planti hap i sot long mani bilong ol ovasis kantri.

Praim Minista Peter O'Neill i tok save long palamen long las wik olsem kantri, bisnis na pipel i no ken pret long foren karensi i sot.

Em i tok PNG i gat inap foren karensi long risev bilong Benk bilong Papua Niugini (BPNG) long mani mak bilong \$US2.2 (K5.8 bilien).

Mista O'Neill i mekim dispela toktok long tok klia long pablik bihain long Spots Minista Justin

Tkatchenko i tokim palamen olsem no gat inap mani olsem na wok long Pasifik Gems netbal stedium i slo daun.

Mista O'Neill i tok i gat inap mani tasol gavman i no bin putim sampela kontrol na lukim ol komesel benk i save sasim bikipela fi long trenseksen bilong foren karensi treding.

Long wankain taim, Gavana bilong Benk bilong Papua Niugini, Loi Bakani i tok kantri i no sot long foren karensi. Em i tok putim foren karensi long wanpela hap bilong benk i no soim olsem kantri i sot long foren karensi.

Em i tok kantri i gat inap foren karensi i stap long risev. Em i tok

em i hatwok long putim mani long ol benk na ol olsem wanem ol pipel bai yusim.

Em i tok em i wok bilong ol komesel benk long go putim saplai long ol brens bilong ol long ol kastoma bai yusim. Tasol em i dia liklik long ol komesel benk i mekim dispela wok bilong putim ol foren karens kes long ol senta.

Ol komesel benk brens long narapela hap i save kam long Pot Mosbi long kisim mani na i go bek long brens bilong ol.

Mista Bakani i tok long mekim isi, BPNG bai givim tokorait long BSP benk long kamap ejen long distributim ol foren karensi i go long ol komesel benk long kantri.

Papua kamap pinis long karim LNG ges go long wol maket

Stanley Nondol i raitim

BIKPELA sip bilong karim PNG LNG ges, MV Papua i kamap long Pot Mosbi las wik long karim LNG ges kago long namba wan taim i go long wol maket long Esia.

MV Papua ol i wokim long Shanghai, Saina na meri bilong Praim Minista Peter O'Neill, Lynda Babao O'Neill i bin putim nem MV Papua.

Longpela bilong en i 290 mita na 172,000 kubik mita bikipela. Em

bai karim LNG ges i go long Esia maket long ol yia i kam.

Menesing Dairekta bilong Exxon Mobil Andrew Barry i tok "Mipela i amamas tru long statim 2015 wantaim bikipela sip, MV Papua na i redi long kisim ges i go aut long wol maket long namba wan taim."

Em i tok dispela sip i kamap long Mosbi na i sapotim tingting bilong kampani long sefti na gutpela sevis bilong ranim ges bisnis.

Papua em sip bilong wanpela

kampani ol i koilm Aquarius LNG shipping Limited na em i join vensa wantaim Mitsui OS K Lines (MOL), Saina Siping Grup.

MOL bai operetim Papua long makim maus bilong PNG LNG long karim ges aninit long daireksen bilong ExxonMobil PNG limited.

Long 2011, Exxon Mobil Corporation na MOL i makim Hudong Zhonghua sip kampani long wokim tupela LNG sip long yusim long PNG LNG projek. Papua em i pinis pas na narapela sip bai redi long 2016.



Bikipela sip, bilong PNG LNG, Papua i kamap long Pot Mosbi las wik long karim LNG ges i go long wol maket long Esia.

PNG bai tekova long ol ausait bisnis

Stanley Nondol i raitim

PAPUA Niugini i mas tekova long ol ausait bisnis bikos planti ol ausait lain i ranim ol Smol tu Midium sais Entaprais (SME) bisnis.

Minista bilong Tred Komes na Industri, Richard Maru i tok nau em i taim bilong kisim ples bilong ol bisnis bilong ol ausait kampani long kantri.

Tasol em i tok yumi mas kamapim senis long gutpela rot we yumi baim bisnis bilong ol.

Minista Maru i tok planti ol SME em ol i risev bilong ol PNG sitisen tasol ol ausait kampani i mekim na kamapim planti winmani na kisim i go long kantri bilong ol yet.

Minista Maru husat i go pas long kamapim nupela SEM polisi i tok, nupela polisi redi na bai go long palamen bai oraitim long Me 2015. Na em i singaut long gavman long sapotim polisi.

Memmba bilong Saut Bogenvil, Joel Lera bin askim Minista Maru long tok klia sapos gavman i gat sampela polisi long banisim ol liklik bisnis bilong kantri bikos planti ol ovasis lain i wok long ranim ol liklik bisnis tu.

Minista Maru i tok taim bilong lukluk em i pinis, nau em i taim bilong kamapim ekxen na bilong baim bisnis bilong ol wantaim mani sapot i kam long gavman.

Mista Lera i tok ol ausait kampani i kam kisim planti ol liklik bisnis long Bogenvil. Em i tok ol i kisim ol bisnis olsem tret stua, taia sevis, haus kai na ol arapela liklik bisnis.

Mista Maru i tokim palamen olsem nupela SME polisi na masta plen i redi na palamen bai oraitim na askim gavman long sapotim.

Em i tok aninit long nupela polisi, ol bisnis bilong ausait husat i laik kam long PNG i no ken gat

invesmen mani long K10 milien na kam daun.

Minista Maru i tok em bai tambu long ol ausait bisnis i kam mekim bisnis olsem tret stua na seken han klos.

Em i tok ausait kampani i ken investim mani long ol malti milien kina bisnis. Na ol i mas lusim ol liklik bisnis long ol pipel bilong kantri yet.

Minista Maru i tok Opis bilong Atoni Jenerel i putim mani pinis long stretim ol lo bilong SME na long Me palamen bai oraitim.

Em i tok Nesenel Developmen Benk bai go pas long yusim benk dinau long baim ol liklik bisnis bilong ol ausait lain.

Em i tok givim bek liklik bisnis long ol sitisen bilong kantri em i bin wanpela bikipela hevi na wari bilong ol pipel na taim palamen i oraitim lo, olgeta ausait kamapni bai go bek na ol PNG yet bai ranim ol liklik bisnis.



INVESTMENT TOKTOK

wantaim Herman Malir na Roy Mumu Jnr


Investmen TokTok NSL's 2014 Kredit Reit

Sapos yu gat sampela askim plis salim i kam long toktoksuper@nambawan-super.com.pg na mipela bai bekim.

Nambawan Super Limited bai i tokaut klostu taim long 2014 Kredit Intres Reit long ol memba bilong em.

Nambawan Super i save putim ol mani bilong ol Memba bilong en gut insait long planti kain ol aset. Long las mun mipela I toktok long aset veluesen. Sampela taim, wanpela aset bai kisim mak i go antap, na narapela taim em bai kisim mak i go daun, tasol wantaim gutpela menesmen i save painim ol narapela rot, na mipela i tingting olsem ol mak bilong ol aset bilong Fan we i stap namel bai i go antap isi, isi.

Insait long sampela yia ol kredit reit bilong Nambawan Super i ken go antap, na long ol narapela yia em i ken go daun olsem yu ken lukim long graf daun-bilo. Tasol, insait long 10-pela yia namel mak bilong ol win mani bilong Nambawan Super we i go insait long ol akaun bilong ol Memba bilong en I bin antap liklik winim 13 pesen long wan wan yia.



Nambawa Supa i save kaunim olgeta mani we i save kam long ol kontribusen bilong ol Memba wantaim ol prais bilong ol aset, ol win mani i kam long ol sea, win man bilong ol kes sekyuriti, rent bilong ol propeti na ol mani i kam long ol aset ol i salim, long ol i makim kredit reit bilong wan wan yia. Fund i save kaunim olgeta mani em i save tromoi long ol Memba husat i go aut, kos long menesim olgeta invesmen, rent bilong opis, pe bilong woklain, na ol takis.

Bihain long dispela, ol i save lukim hamas mani i stap na dispela ol i save brukim i go insait long akaun bilong olgeta Memba, na hamas mani bai i go insait long akaun bilong memba em ol i save skelim long mak bilong hamas mani i stap long akaun bilong ol. Olsem na long dispela as, olgeta wokman na meri i mas was gut long ol kampani o dipatmen bilong ol i mas salim ol kontribusen mani bilong ol i go insait long Fund long taim stret. Long dispela we bai Nambawan Super i ken putim ol dispela mani i go long ol hap we bai ol i ken gro na ol akaun balens bilong ol Memba bai i go bikipela long yia 2015.

Yia 2014 i bin wanpela hatpela yia long Nambawan Super i kamapim bikipela mani, na maski kredit reit bilong 2014 bai i no kamap olsem bikipela win mani bilong 32 pesen long 2007, na em i no inap go daun tru long mak bilong 2 pesen we i kamap long yia 2011. Em bai stap strong long soim strongpela wok we Nambawan i bin wok hat long kamapim, bilong yu tasol, ol Memba bilong mipela.

Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIGGER, BETTER, SAFER, STRONGER AND STILL NUMBER 1



Ramu NiCo Sapatim Edukesen na Diverlopmen

LONG 2006 taim Ramu NiCo Menesmen (MCC) Limited, diverlopa bilong namba wan nikel projek long kantri I bin kamap long Kurumbukari (KBK), ol I no bin lukim wanpela skul I bin sanap. Nogat hausik na polis stesin tu. Ol pikinini I bin wokabaut go long wanpela praimer skul long Daunagari we I longwe tru.

Dispela taim, ol papagraun ananit long KBK Lendona Asosiesin (LOA) I bin paitim toktok wantaim Ramu NiCo na wanbel long kamapim Enekuai Komyuniti Skul. Tete, dispela skul I gat moa long 150 sumatin stap long gret 3 i go gret 7.

Enekuai komyuniti skul i bin kirap long 2012 na i sevim ol pikinini i kam olsem long Enekuai, Dengekeve, Kinimati, Morinam, Dabrabu, Miai na ol narapela hap tu.

Ramu NiCo i luksave olsem edukesen em bikpela samting tru ol pikinini insait long Projek eria bilong en nidim long strongim human risos diveolpmen long bihain taim na I sanap strong long helivim ol papagraun.

Olsem na Ramu NiCo bai wok bihainim rivais memorandum ov agrimen (MOA) komitmen em i gat long strongim edukesen long strongim human risos diverlopmen long ol eria em i wok long en.

Long soim dispela, Ramu NiCo long Februari 11 i bin mekim wanpela donesin i go long Enekuai komyuniti skul long Enekuai rilokesen eria long Kurumbukari maunten we kampani i givim 60-pela nupela desks na 60-pela nupela sia i go long Enekuai komyuniti skul.

Presiden bilong Ramu NiCo, Mista Wang Jicheng i bin go wantaim ol sinia menesman bilong Ramu NiCo KBK Main long stap insait long dispela seremoni long soim olsem Ramu NiCo i gat strongpela tingting long strongim edukesen na diverlopmen insait long komyuniti.

Mista Wang i tok olsem stap bilong Ramu NiCo Projek i bringim ol arapela diverlopmen patnas olsem Nesanel Gavman wantaim Mineral Risoses Atoriti (MRA) long helpim tu long sait long edukesen taim MRA i givim mani sapat long lenona kampani, KBK Limited long wokim ol nupela klasrum na haus bilong ol tisa long Enekuai. Dispela



Presiden bilong Ramu NiCo (MCC), Wang Jicheng i soim ol nupela desks na sia long lokal lida bilong Enekuai, Michael Yori.

helivim i kam ananit long luksave bilong Ramu NiCo Projek MOA.

Em i tok olsem Ramu NiCo em wanpela diverlopa bilong nikel/kobalt projek we bai sanap yet long helpim ol pikinini long sait long edukesen long ol yia i kam. Aninit long Rivais MOA, Ramu NiCo i save helpim long peim skul fi subsidi i go long ol sumatin insait long projek eria. Dispela em wanpela long-ol komitmen aninit long MOA.

Donesin bilong Ramu NiCo long Enekuai komyuniti skul i kamap long rait taim stret taim skul yia 2015 i stat. Ol sumatin, tisa na ol papamama i amamas long soim welkam long Presiden bilong Ramu NiCo, Wang Jicheng wantaim menesmen bilong KBK Main husat i go long givim dispela donesen.

Prais bilong ol nupela desks na sia em moa long K8,000 na kampani i baim long BNBM Hadwea long Madang. Long dispela dei tu Kampani i givim sampela donesen olsem spot bal na ol arapela samting bilong ol tisa i yusim i go long skul.

Enekuai em wanpela rilokesen eria antap long KBK maunten we kampani i wokim long ol papagraun



Ol skul sumatin na ol papamama i amamas long bung wantaim Presiden bilong Ramu NiCo, Wang Jicheng wantaim KBK main menesmen. Presiden Wang i salensim ol papamama long salim ol pikinini long skul.



Ol menesmen bilong Ramu NiCo i sindaun long nupela desk na ol sia ol i givim long Enekuai komyuniti skul.

i go stap long en bihain long maining wok i kamap long eria bilong ol. Dispela rilokesen eria em ples skul i stap long en.

Presiden bilong Ramu NiCo, Mista Wang i tok olsem kampani bilong em i luksave olsem edukesen bilong ol pikinini em bikpela samting tru long helpim bihain taim diverlopmen long dispela ples.

"Kampani i luksave long hatwok ol pikinini i wok long bungim taim nogat skul i stap. Ol i save wokabout long maunten i go daun long Danagari long skul. Dispela i

mekim planti pikinini i lusim skul," Mista Wang i tok.

Komyuniti lida na lenona asosiesin memba, Michael Yori i givim bikpela tok tenkyu i go long Ramu NiCo na tok amamas olsem Kampani i wok long bihainim komitmen bilong en aninit long MOA.

Mista Yori i tok kampani i wok long luksave long nid bilong komyuniti tasol em mas wok pastaim na ol helpim bai i kam yet, tasol ol pipel i mas mekim gutpela yus long wanem samting ol i kisim long helpim sindaun bilong ol.

Em i tok edukesen bilong ol pikinini long Kurumbukari em bikpela samting long bihain taim diverlopmen, na em i amamas olsem Ramu NiCo i luksave long dispela na i givim helpim.

Mista Wang i tokim ol pipel husat i stap long dispela seremoni tu olsem ol lenona asosiesin blong KBK i wanbel long Kampani olsem Enekuai praimer skul i mas kamap insait long rilokesen wantaim helt klinik, polis stesen na ol haus-kapa ol lokal pipel i ken stap long en na amamasim laipstail bilong ol.

RAMU NICO **Ramu NiCo redi long givim**
 Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.
 Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.
Ol dispela namba i soim klia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komyuniti'

Praim Minista tok klia long SWF bil

Stanley Nondol i raitim

PRAIM Minista Peter O'Neill i tok klia long palamen olsem Soveren Wel Fan bil i no kamap long taim bikos planti wok konsaltesen i kamap long raitim bil na menesim mani bilong risos na daunim pasin korapsen.

Mista O'Neill i mekim tok klia bihain long Oposisen lida, Don Polye i tok SWF bil i kamap leit long palamen na bilong wanem em i no redi bipo long kantri salim LNG ges go aut long wol maket.

Mista Polye i tok em i no stret long SWF bil i no redi na kantri salim ges pinis. Em i askim tu bilong wanem na gavman bai menesim SWF long ausait.

Praim Minista O'Neill i tok olsem toktok bilong Don Polye i no stret. Mista O'Neill i tok wanpela independen bodi aninit logng ogenik lo bai menesim mani bilong SWF na olgeta winmani bai go stap long

wanpela hap we gavman bai yusim long baset long olgeta yia.

Las wik, palamen i vot na tok orait long namba wan riding. Mista O'Neill i tok winmani bilong LNG ges i no kam insait yet bikos SWF bil i no bin redi.

I gat ripot olsem kantri salim moa long 60 sipmen bilong LNG ges pinis. Na ExxonMobil PNG i menesim dispela mani long ausit stat long mun Me las yia.

Praim Minista O'Neill i tokim palamen olsem benk i givim tok orait pinis na winmani bai kam insait stat long Febueri 20.

Planti toktok i kamap long plamen long SWF bil taim Mista O'Neill i putim long ol memba i vot long taim bilong namba tu riding.

Memba bilong Kikori Mark, Maipakai i tok bikipela wari em long wanem rot bai gavman i putim long menesim mani aninit long SWF.

Em i tok gavman i no ken makim

menesmen bilong menesim mani bilong SWF bikos taim gavman i makim man long lukautim mani, planti asua i save kamap.

Mista Maipakia i tok SWF i mas gat independen lain i lukautim. Em i tok gavman o ol politisen i no ken makim ol bot memba o ol yet i no mas stap insait bikos planti asua i save kamap taim ol politisen i mekim wok bilong lukautim pablik mani

Mista O'Neill i tok moa olsem SWF i kamap aninit long lo na i gat tupela fan,- Sevings na Stebilisesen Fan.

Em i tok bai ol I rausim mani long SWF aninit long Stebilisesen Fan na bai kamamp long wan wan yia tasol palamen tasol bai givim tok orait long rausim mani.



Poto: Praim Minista, Peter O'Neill

DSTP Paiplain bilong Ramu NiCo stap orait - AUS-ROV

DIP si teilings plesmen (DSTP) o rot Ramu NiCo Menesmen (MCC) i yusim long rausim ol pipa i go daun long solwara long Basamuk em i wok orait inapim tingting bilong ol saveman na nogat bagarap o hevi i kamap long solwara.

Ol saveman bilong lukluk na sekim DSTP i bin karimaut wok long sekim paiplain na i tokaut long dispela long las wik tasol. Tupela saveman bilong AUS-ROV, wanpela envairomen konsalten kampani bilong Australia em Alex wantaim Adrian Jahnke i bin go stap wok long Basamuk Rifaineri bilong Ramu NiCo na i givim ripot.

Ol i karimaut ol wok wantaim helpim i kam long ol Ramu NiCo helt, sefti na envairomen (HSE) opisa.

Wok sekim long Basamuk Rifaineri i bin kamap long Februari 4 naol wok i bin lukluk long sait long dip si teilings plesmen (DSTP) paip igo daun mak long 150 mitas daunbilo long solwara.

Ol i painimaut olsem paiplain we i save karim ol pipa long rifaineri i go tromoi daun long solwara em i stap long gutpela kondisen na nogat bagarap long en. Moa long en tu ol i lukim olsem ol pipa we i go aut long paip

pundaun long ples we pipa i mas go daun long en stret.

Ol i yusim spesel masin ol i kolim Rimot Opereting Vihakel (ROV) na ron long wanpela bot bilong Madang Risot Hotel long karimaut wok bilong sekim paiplain. Ol i joinim dispela ROV i go wantaim wanpela kompiyuta long bot na yusim ol longpela pawa rop we i pas wantaim ROV na em i go daun long flua bilong solwara mak long 150 mita daunbilo na kisim ol rekot na salim i go antap long bot long kompiyuta.

Dispela ROV masin em ol i save yusim oltaim long sekim DSTP paip long painim sapos i gat lik o paip i bagarap na ol pipa i go aut long solwara i go daun long 150 mita daunbilo.

ROV em Ramu NiCo i yusim tu bihain long Gavaman I putim kondisin ananit long OEMP (Operesin Envairomen Menesmen Plen).

Wanpela wok sekim bilong DSTP paiplain tu i bin kamap long 2013 taim wanpela konsalten, Ian Hargreaves na Asosiets i karimaut wok painim aut we riport blo ol i tokaut olsem i no gat bagarap i kam long ol teilings o pipa we i go aut long taim Projek i statim operesen bilong en i kam nau.



Ol woklain i wok long ROV long sekim DSTP paiplain

TAMPARA!

Air Niugini is proud to resume services to Aropa, Kieta.
3 Weekly Flights - Tuesday, Thursday and Saturday.

Effective
20th December
2014



Air Niugini

www.airniugini.com.pg
EXCLUSIVE CARRIER FOR THE 2015 PACIFIC GAMES

Call Toll Free on **180 3444** or contact your nearest Air Niugini Travel Centre or Travel agent for further details. Schedule - Tue & Sat: Pom-Kie (direct), Thu: Pom-Kie (via Rabaul).



Ol Pasifik ogenik fama bai sapatim Yia bilong Graun

BILONG luksave olsem “soil” o graun i wanpela bikpela samting long laip wantaim wara, air o win na lait bilong san, ol ogenik fama long Pasifik rijon bai sapatim strong 2015 Yunaitet Nesen Intenese-nel Yia bilong ol Soil/Graun.

Aninit long Pasifik Ogenik na Etikelk Tred Komyuniti (POET Com), ol ogenik fama na Seketeriet bilong Pasifik Komyuniti bai wokim awenes i go long sivil sosaiti na ol disisen meka long bikpela wok we soil o

graun i gat long laip bilong man, ol enamel na ol plent.

“Soil o graun i no samting we pipel i save tingim olgeta taim, nogat. Tasol em i as long laip yumi stap long en long dispela graun, stat long kaikai i go long haus na klinpela wara,” Kodineta bilong POET Com, Karen Mapusu i tok.

“Em i save kisim samting olsem 2,000 krismas long kamapim 10 sentimita bilong graun long neturel rot, tasol Yunivesiti bilong

Nu Meksiko i tok bikos yumi no menesim gut graun, wol i wok long lusim 6.4 bilien ton graun insait long wan wan yia.

“Sapos yumi laik kaikai yet long bihain taim, yumi mas sevim graun bilong yumi. I gat moa long 5000 setifaid ogenik fama long Pasifik na planti moa i wok long yusim rot we ol tumbuna bilong bipo i bin yusim long kamapim gut helt bilong ol, na tu, long kamapim gut graun. Ol dispela fama i mekim bikpela wok long lukautim ol graun bilong

yumi na fud sekyuriti.

Kempen bai karimaut ol nius stori, infomesen grefiks na ol YouTube klip bai kamap long POET Com web pes www.organicpasifika.com.

As tingting bilong en em long promotim ol gutpela polisi na eksen long lukim olsem sastenebel menesmen i stap na tu, protekim o lukautim ol risos bilong graun na tu, long givim ol pipel ol samting ol i ken mekim na kontribut long sevim graun na bildim graun.

KABON PROJEK WOKSOP

SAMTING olsem 40 pipel i bin sindaun long Mosbi las wik long Nesenel Stekholdas Infomesen woksop long Fores Kabon projek insait long Sentra ISuau eria long Milen Be Provins.

PNG Nesenel Fores Atoriti (PNGNFA) na GIZ, wanpela ogenaisesen long Gemeni i go pas long dispel wanpela de woksop bin kamap long Lamana Hotel.

As tingting long holim dispel woksop em long givim infomesen long ol wok kamap na ol risal long dispel pailot projek long Suau eria.

PNG em i ris long ol neturel risos we ol bikbus, diwai na ol arapela samting insait long em i stap yet.

Na PNG i wanpela long ol kantri long wol we i save salim ol tropikel timba na ol wud prodak i go ovasis.

Pasin bilong katim ol bikbus na ol diwai i save daunim banis o lukaut long ol posin ges i go aut bikos ol bikbus na diwai i save holim ol dispel na balensim.

Mekim na wol we PNG i wanpela long ol, i wok long bungim ol klaimet senis hevi.

Dispela woksop i kamapim ol eksen plen bihain ol i kisim ol ripot long Suau pailot projek.

Ol fama sindaun long woksop

TRU ol rot bilong tumbuna long kamapim moa materiel long planim ol kaikai bilong yumi olsem taro na banana, em i save yusim bikpela taim, hatwok na bikpela mani long kamapim inap materiel long wokim nupela bilong planim.

Nesenel Egrikalsa Risets Institut (NARI) i kamapim ol nupela teknoloji long

taro/yam mini set na banana bit rot long helpim ol fama long wok bilong ol long hariap kamapim moa materiel long planim long ol stepel krop long

neks sisen bilong planim ol krop, long sotpela taim na liklik leba na mani.

Ol fama bilong ples Gabensis long Wau-Bulolo distrik, Morobe provins i bin sindaun long wanpela de trening woksop ol NARI woklain i bin holim.

Ol i bin kisim skul long rot bilong kamapim ol yam mini set we ol i yusim

Discoreara tundatas yumi save long en olsem Afriken yam. Ol i bin kisim trening tu long kisim save long wok menesmen na long planim ol yam.



▲ **MAMA O!** Traipela na ol naispela mama bilong yam i pulap kapsait we dispel yangpela meri Gabensis long Wau long Morobe provins i soim long pablik. Ol kain yam i save kamap gut long sampela hap bilong PNG. Wanpela long ol dispela yam i ken pulmapim wanpela sospen.

Poto: NARI



◀ **RUREL WOKSOP:** Tude, planti manmeri long ol rurel ples i laik save long ol samting bai helpim ol i kamapim gut laip na sindaun bilong ol long sosel spirituel, ikonmik na fisikel sait.

Poto i soim sampela man na meri bilong Siwai na Buin long Saut Bogenvil i bin sindaun long humen rait na troma kaunseling woksop we Sister Lorraine Garasu na lain bilong em i bin go pas long en.

Poto: Veronica Hatutasi

12/12/2014

Paia bilong Gordons Tas Ragbi i lait strong yet

OLGETA wiken, husat manmeri i raun i kam klostu long Gordons Polis Bareks pilai graun bai harim bikipela nois bilong ol manmeri i singaut amamas. As bilong dispela nois bilong ol sapota em ol tas ragbi gem i save kamap long hap.

Maski ren o san, ol tim stat long D gret bilong ol liklik rat i go inap long ol A gret tim bilong ol bikipela, i no save wari, ol i givim tasol. Na ol sapota tu i no wari, ol i save sambai tasol long singaut na kirapim bel bilong ol yangpela long pilai strong.

Wankain olsem ol arapela komyuniti spot long long NDC, Gordons Tas Ragbi em i komyuniti spot tru. Long Sarere, taim ol liklik i pilai, bai ol mama na bubu

na ankol na arapela famili memba na pren i kam raunim fil na kamap ol sailtain referi gen na traim bosim pilai. Tasol ol gem i ran gut, na long pinis bilong pilai, ol sapota i amamas na lusim fil na i go kam long haus bilong ol.

Ol gem long Gordon Tas i kam kamap long mak bilong semi fainel nau. Ol manki i bin stat pilai long pinis bilong las yia na dispela gem i pulim ol pikinini i kam long ol kona bilong Erima, ol strit long Gordons na insait long Gordons Polis Bareks yet.

Wan wan tim i gat woa kraik bilong ol yet na taim ol i singaut bai yau i pas long nois. Hat bilong paia tu i kamap strong moa nau, na husat tru bai inap kilim dai paia!

Poto stori – Anna Solomon



Ol yangpela pilaia bilong Texas Knights i malolo long hap taim.

OIL SEARCH KISIM NEMING RAIT LONG TOS RILEI



Ol Huli danis man i sanap wantaim Eksekutiv Jeneral Menesa Ekstenal Afeas bilong Oil Search, Gereaa Aopi long taim ol i lonsim tos baten we bai go long olgeta 22 provins insait long kantri inap long 100 de olgeta. Tos bai kam bek long bikipela siti bilong yumi Pot Mosbi long taim bilong opening bilong Pasifik Gem. Dispela tos baten na raun bilong em long olgeta provins em Oil Search i sponsaim wantaim K5 milien. Dispela tu i givim rait long Oil Search olsem bikipela sponsa na neming rait bilong tos baten rilei. Oil Search em kampani bilong yumi PNG na em i laik kisim dispela tos baten i go stret long wan wan provins long soim ol ples lain olsem ol tu i hap bilong dispela, bikipela pilai, Pasifik Gem bai kamap long mun Julai. Poto Stori Nicky Bernard.



D Gret tim bilong ol Erima Magpies i redi long ran i go insait long fil.

Murray laik lukim Madang FC daunim Hekari

JAMES G. KILA i raitim

PRESIDEN bilong Madang Semba bilong Komes na Industri na siaman bilong Madang Futbol Klap (FC) insait long Nesenel Soka Lig(NSL), Kevin Murray i amamas long ol teknikal opisal bilong tim long bringim win i kam insait long tim las wiken.

Madang FC long las wiken i kam bek gut tru na winim Oro FC 3-0 long mein gem bilong NSL we i bin kamap long Bomana CS long las wiken.

Mista Murray i tok amamas long ol teknikal opisal olsem kosa Francis Moyap, ol treinas olsem Michael Stevens na ol arapela na tu gutpela tim menesa Tweedy Malagian.

Em i tok dispela wiken bai wanpela bikipela salens tru bilong Madang FC taim ol i bungim sempion tim Hekari Yunaited long Laiwaden Oval long Madang.

Dispela gem em bai pulim planti ol strongpela sapota bilong soka long Madang long go lukim Hekari Yunaited husat i gat ol biknem pilaia we i save makim PNG olsem kepten David Muta,

Koriak Upaiga, lapun straika Kema Jack na stail midfilda bilong Besta na Morobe Yunaited pastaim, Emmanuel Simon.

I gat ol arapela pilaia bilong Solomon ailan tu i stap long Hekari, na ol bai soim stail bilong gem bilong ol egensim ol boi bilong Madang long Sarere.

Madang FC i bringim gutpela sevis long midfil dipatmen wantaim Samuel 'SK' Kini wantaim kepten bilong ol Max Segum na long fran lain bai lukim ol spitman olsem Alwin Komong. Vanya Malagian na Hansom Topio long testim banis bilong Hekari.

Dispela gem long Madang bai pulim moa manmeri stret na ol pipel long go lukim tupela tim i salens.

Planti ol strongpela soka sapota bilong Madang FC i laikim olsem boi bilong ol i win long Laiwaden oval bilong em asples bilong ol.

Long nau yet Hekari i go pas long poin lada bilong NSL resis wantaim 11 poin, Lae City Dwellers 7, Oro FC 6, Madang FC 5, Besta Yunaited 3, POM FC 3 na Admiralty 2.

Meri tim Ragbi bai go long Komonwel Yut Gems

PAPUA Niugini bai salim wanpela tim bilong meri long salens insait long ragbi seven kompetisen pilai long Komonwel Yut Gems long Apia-Samoa long dispela yia Septemba.

Dispela yia em i namba wan taim bilong ol meri long pilai ragbi seven insait long Komonwel Yut Gems, na Papua Niugini i wanpela bilong ol 6-pela kantri husat bai stap insait.

Ol narapela kantri em Canada, Scotland, Australia, Cook Island na Samoa.

Sif Eksekutiv bilong Komonwel Gems Federesen i tok, "Mipela i amamas long tokaut long ol Komonwel kantri tim long dispela bikipela intesenel Ragbi seven pilai bilong ol yangpela pilaia. Na tu long mekim histori long kamap namba wan wimen ragbi

seven tonamen long Komonwel Yut Gems."

PNG tim bilong ol man i no stap insait long dispela yia tasol ol meri bai mekim histori long kamap namba wan tim long salens insait long dispela Komonwel Yut Gems.

"Long dispela bikipela kompetisen bilong ragbi seven insait long Komonwel, mipela bai lukim planti gutpela pilai," Sif Kodineta bilong Samoa 2015 Komenwol Yut Gems, Vitolio Lui i tok.

Ol kantri husat bai bai stap insait long dispela pilai i gat taim long sekim sapos ol bai kisim ples bilong ol long ragbi seven wantaim ol arapela gem long pilai insait long dispela kompetisen.

Generel menesa bilong PNG Ragbi, Frank Genia i tok, "Mipela i tenk yu tru na amamas long makim ol wimen 7s tim long go insait long

dispela Komonwel Yut Gems long Samoa."

Em i tok, Wol Ragbi long 24-pela mun i go pinis i bin wok strong long promotim na divelopim wimen ragbi long Wol.

PNG Rugby Football Union i tok, long 21,000 lain I bin pilai long 2014 48% em ol meri.

Dispela i lukim CYG i givim PNGRFU we long strongim ol pilaia na givim PNG Ragbi sans long kamapim Junior elit ragbi kompetisen so bai givim PNGRFU ples long makim ol pilaia long stap insait long ol gems." Genia i tok.

Pilai bilong tim bilong PNG meri bai stat bihain long pinis bilong Pasifik Gems long Pot Mosbi.

"Ragbi Seven i kamap bikipela na pulim planti yanpela lain long Wol. Mipela i amamas

long dispela Komonwel Yut Gems sans long soim kala bilong wol pilaia bilong ol man na ol meri we bai go pilai long namba wan taim long ragbi seven long Komonwel Yut gems." Wol Ragbi Siaman Bernard Lapasset i tok.

Dispela Samoa 2015 Yut Gems bai stap long Septemba 5 i go inap long de namba 11, na bai lukim samting olsem 1,000 yanpela etlit husat krismas i stap namel long 14-18.

Dispela bai namba faiv Komonwel Yut Gems bihain long ol ples olsem Isle of Man (2011), Pune, India (2008), Bendigo, Australia (2004) na Edinburgh long Scotland (2000).

Komonwel Yut Gems em i wanpela namba wan sans long lukim ol yangpela etlit long wol bilong spot.



Nu Silan i selebretim wanpela trai taim em i winim Australia 22-11 long Four Nations fainel.

Kosa Stephen Kearney i tok Nu Silan inap kamap long nupela taim na go pas long Australia bihain em i win long Four Nations pilai long Wellington. Long wanpela strongpela pilai egensim ol Kangaroo, Saun Johnson i bin pilai gut tru long dispela 22-11 win bilong ol Kiwi we samting olsem 25, 183 pipel i bin lukim i stap. Manu Vutavei i bin skorim tupela trai long kamap olsem "all time" tra skoring rekot holda bilong Nu Silan.



Ol Saut Sydney Rabbitohs i wol sempion klap bihain long ol i winim Supa Lig sait, St Helens long 39-0 mak long Langtree Park long Mande.

Dispela win i mekim ol tim i pilai long Australia i mekim gut long Wol Klap siris o pilai. St George-Illawarra i bin winim Warrington wantaim 18-12 mak, na Brisben i bin winim Wigan long 14-12 mak.



India i bagarapim stret Saut Afrika bihain long Shikhar Dhawan i wokim senseri bet bilong em long MCC.

India i soim olsem em i trupela na strongpela tim long difendim Wol Kap taitel bilong em taim em i bagarapim Saut Afrika na win long 130 ran win long MCC pot.

Gold Coast Titans drag skendol em i wanpela hevi long sosaiti, NRL bos, Dave Smith i tok.



NRL Sif Eksekutyutiv , Dave Smith, i tok drag skendol o hevi long kisim smok no gut i kamap insait long Gold Coast Titans NRL Klap na Queensland Reds ragbi sait i no makim kalsa na lo bilong footy.

Kriket Wol Kap

Inglan i winim Scotland wantaim 119 ran long Christchurch long kisim namba wan win long tonamen.

Bihain long ol ko hos, Australia na Nu Silan i winim em long opening pilai, Inglan i bin postim 8 long 303. Dispela em bihain ol i askim em long bet bipo ol i lusim Skotlen we i bin betim 184 long 47.2 ovas long dispela de we ol i ting olsem em bai ren na ol i pilai, tasol bihain, i bin tanim i go long gutpela de we san i bin kamap.

Inglan i bin winim Skotlen wantaim 119 ran long Kriket Wol Kap Pul A pilai long Hagley Oval long rekotim namba wan win bilong em long tonamen.



Oi wiken spot long foto



Mipela ya: Tim Madang FC long NSL soka resis.

Kovera Dogs tim bilong Gordons tas.



Pilaia bilong Hekari wantaim bal i traim long abrusim pilai Pom FC. Tupela tim i dro 0-0.

Tupela tim bilong Erima, Magpies na Bears pilai resis long kisim bal long Gordons tas fainal.



Oro pilai i traim long kam namel long ol pilaia bilong Madang FC long NSL pilai bilong ol long Mosbi. Madang i win 3-0.

Pilaia bilong Sharks i pasim ai na ron stret long pilai bilong Dogs long tas pilai bilong long Gordons.

Oi poto: Nicky Bernard

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG



Manufactured by



RD Tuna Canners Ltd.

Moa mit na
oil insait



TUNA IN OIL

Oil Search i givim bikpela han long Pasifik Gems

**OL pipel bilong Papua Niugini
bai gat sans long lukim wan-
pela spesel mak bilong 15
Pasifik Gems.**

Dispela spesel Oil Search Relay baton bai lusim Pot Mosbi long 26 Mas na raun i go long olgeta 22 provins long kantri na bai kam bek long Mosbi long 4 Julai, de bilong opim Gems.

Oil Search tokaut long dispela spesel presen bilong em long dispela wik na i givim sek bilong K5milien i go long siameri bilong Gems Ogenaising Komiti, Emma Waiwai. Oil Search i gat naming raits na bai ol i kolim Oil Search Pacific Games Relay.

Bai moa long 2,000 rana i karim dispela baton long taim em i raun i go long ol provins. Dispela baton em i bihainim stail bilong kundu na biknem atis bilong PNG, Gickmai Kundun yet i wokim long kopa. Kopa i save kamapim bikpela mani bilong kantri.

Long taim Oil Search tokaut long dispela naming raits bilong em, Gereia Aopi, Eksekutiv

Jeneral Menesa Ekstenel Afes na Sastenabiliti i tok, Oil Search i amamas long bringim dispela Gem i go long ol pipel bilong Papua Niugini.

Em i tok planti bilong ol bai i no inap kam long Mosbi long lukim dispela Gem, tasol ol i ken lukim dispela spesel kundu baton na pilim amamas bilong dispela bikpela gem i kamap long kantri.

Minista bilong Spots, Justin Tkatchenko i bin mekim sampela toktok tu long dispela taim. Em i tok welkam long ol etlit bilong ol dispela 28 spot bilong Pasifik Gems.

Em i tok Pasifik Gems i kamap long strongim pren namel long ol kantri long Pasifik rijon long taim namba wan gem i bin kamap long Fiji long 1963 i kam inap nau.

Minista Tkatchenko i bung wantaim Oil Search long salim tok amamas bilong em i go long ol spotman na meri bilong PNG husat bai pilai long dispela gem.

Ol pilai bai kamap long Mosbi long Julai 4 i go inap 18.



OL WOK BAI PINIS LONG TAIM STRET: Projek menesa bilong Fletcher Morobe Geoff Hall i soim Prait Minista Peter O'Neill na Gavana bilong NCD Powes Parkop long wok ol mekim long Taurama Senta.

Poto: Nicky Bernard



ISUZU N-SERIES

the Perfect Business Partner.

**BOROKO
MOTORS**

Port Moresby 325 5255 Lae 472 1144 Madang 422 2659 Mt Hagen 542 1933 Goroka 532 3552 Kimbe 983 5035 Kokopo 982 8193 Tabubil 649 9048

Email: info@borokomotors.com.pg | Web: www.borokomotors.com.pg

